

ROMAQ

Pê Chyáng Hun Kat é Laiká (Romans)

¹ Hkrisduq Yesuq é dui-nhâng zoshâng eq lagyo dut râ matú, Garai Gasâng eq ji yu é hui luí, chyoiyúng Chyúmdang pé má, ² Garai Gasang gi, hí hí mai Yhâng é myiqhtoí pé dông danggidiq byí to bê nghut é, Yhâng é Yuqzô é hkyô nghut é, Garai Gasâng é gabú danglu é matú hkyin to huí é sù, ngò Poluq gi, Romaq myuq má nyi é, Garai Gasâng eq chyitdap é hui luí, sân-yúng bang dut râ matú ji yu é bang banshoq lé, dang kyô kat lhê. ³ Yhâng é Yuqzo haú gi, byù hkyam dông ga jáng, Dawiq é awut ashín nghut ri; ⁴ Yhang gi, shi é mai dum dui toq é dông, Garai Gasâng é Yhangzo nghut é hkyô lé, chyoiyúng hkyo é Woi-nyí dông mai, hpungwup a-tsâm eq sé nhâng bê nghut ri. Yhang gi, nga-nhûng é Yhumsíng Yesuq Hkrisduq nghut ri. ⁵ Yhang dông mai le, Yhâng myíng é matú le, ngamoq gi, byù myû chângjup mai byù ji yù mù, lumjíng hkyô lé châng nyi nhâng râ matú, jeju eq lagyo ayá lé wó hkam yù bê nghut lhê. ⁶ Nungmoq le, Yesuq Hkrisduq eq séng râ matú ji yù huí é bang má lòm bekô nghut ri.

⁷ Nga-nhúng é Îwa Garai Gasang eq Yhumsíng Yesuq Hkrisduq chyáng mâ é jeju eq nguingón hkyô gi, nungmoq chyáng ru joq nyí sháng gaq ô!

Poluq, Romaq Myuq Má Ló Kum Nau É Hkyô

⁸ Nungmoq é lumjínq hkyô lé, mingkan gón má taí pyo ló bê nghut é yanmai, sâng-hi má, ngò gi, Yesuq Hkrisduq é myíng mai, nungmoq banshoq bâng é matú, ngá é Garai Gasang lé, jeju hkya-on lhê. ⁹ Ngá é kyûdung dang pé má, ngò, nungmoq lé hkâ-nhám le bûn nyi é hkyô lé, Yhâng é Yuqzô é hkyô gabú danglù lé hko kyô nyi é má, ngá é myit nhiklum banshoq èq dojaú é Garai Gasang gi, ngá é saksé nghut lhê; ¹⁰ Garai Gasang ô nau é nghut jáng, hkâ-í a myáng má, ngò, nungmoq chyáng wó jé lé râ hkyô htong byi râ matú, ahkuí, ngò kyûdûng lhê.

¹¹ Ngò gi, nungmoq lé, woi-nyí hkyô eq sêng é chyunghuq wó gâm byi mù, nungmoq lé wum-o wó lhoq kíng byi râ matú, nungmoq lé gyai yhang myàng nau nyi ri. ¹² Haû su nghu é gi, nga-nhúng rayuq eq rayuq é lumjínq hkyô dông mai, nungmoq eq ngò, myit wum byí é hui râ matú nghut lhê. ¹³ Gumang wui ê, ngò gi, haû tûngbaù pé chyáng mai ashi wó yu é eq rajung za, nungmoq chyáng mai le ashi wó yû râ matú, nungmoq chyáng lé jé râ nghû adàm dàm dâ wú é nghut kôlhang, ahkuí jé shoq hkûm tang pyám huí é hkyô lé, nungmoq lé sé nhâng nau ri.

¹⁴ Ngò gi, Grik pé lé le, Grik a nghut bang lé le, hpaqchyí bò bang lé le, hpaqchyí a bò bang lé le, chyín dap to sù nghut lhê. ¹⁵ Haû nghut é yanmai, ngò gi, Romaq myuq mâ é bang nungmoq lé le, haû gabú danglù gyai yhang hko kyo nau nyi é nghut lhê.

¹⁶ Haû gabú danglù hkyô má, ngò gi, a hoq é nghut lhê; hkâsu mù gâ le, haû gi, sâng-hi má Yudaq byu pé, hau htâng tûngbaù pé má, lumjínq é sù

yuq hkgangmó lé hkyi yu é wó hui nhâng râ nghut é, Garai Gasâng é hpungwup a-tsam nghut lhê. ¹⁷ Hkâsu mù gâ le, lumjínng myit mai wó yú luí, lumjínng myit má gíng nyi é, Garai Gasâng chyáng mâ é dingmán hkyô lé gi, gabú danglù haú má hpông shit bê nghut ri. Haú gi, "Haú dingmán sù gi, lumjínng myit mai asak duì râ nghut lhê." ✧ ga kâ tô é eq rajung za nghut ri.

Xângzo Byu Pê Htoq Má Garai Nhkmo-yô É Hkyô

¹⁸ Haú tengmán hkyô lé, yhumsing é agè ashop hkyo eq zik hkûm pyâm é byu pê é agè ashop hkyô eq garai a bo é hkyô pé banshoq htoq má, mauhkûng mai Garai Gasâng é nhikmo-yo hkyô lé hpông shit bê nghut ri. ¹⁹ Haí mù gâ le, Garai Gasang gi, Yhang eq sêng é hkyô, yhangmoq lé san za tûn shit bê nghut é yanmai, Garai Gasang lé sé âng é hkyô gi, yhangmoq chyáng san za dut bê nghut ri. ²⁰ Hkâsu mù gâ le, mau htoq xâng hkun mai, hpan tô é zè pé lé wú jáng, Yhâng é a byu-myang é isâm nghut é, ahtum abyuq é hpungwup a-tsam eq Garaí é myit sâmlai lé gi, san za wó myâng, wó sê gyô é nghut lhê. Haú mù luí, byu pé gi, mara mai wó he lut râ hkyô a joq lo nghut ri.

²¹ Haí mù gâ le, yhangmoq gi, Garai Gasang lé sê to kôlhang, Yhang lé Garaí dông a shigyaú kô é eq, jeju a hkya-on kó nghut ri; yhangmoq myit é hkyô pé gi, akôm dut byuq é eq, nhik a gyíng é yhangmoq é myit nhiklhum gi, chut byuq bê nghut ri. ²² Yhangmoq gi, hpaqchyí bò bang nghut lhê ga kôlhang, a-ngok é bang dut byuq bekô nghut ri. ²³ Haú mù, htên byoq a sê é Garai Gasâng é

✧ 1:17 Hbk 2:4

hpungwup shingkang lé, htên byoq sê é byù zòng, ngoq lhô, dusak lhô eq yê jung dusak lhô pê èq, htaî lhik pyám bekô nghut ri.

²⁴ Hau é yanmai, Garai Gasang gi, yhangmoq é gungdu lé rayuq eq rayuq hpau a tap lhum kó râ matú, a sansêng é gungsho zùm-yap hkyô kut râ nghut é, yhangmoq é yut yut ô nau é i-myt má, yhangmoq lé ap pyám bê nghut ri. ²⁵ Yhangmoq gi, haû Garai Gasang é tengmán hkyô lé, mhaû é hkyo èq htaî lhik pyám kômù, hpân Sû lé noqkuq dojaú râ malaî, mhaû hkyô nghut é hpan tô é zè pé lé noqkuq mù, dojaú akô nghut ri. Hpân Sû haû gi, ahtum abyuq hkya-on hui sù nghut ri. Amen.

²⁶ Haû nghut é yanmai, Garai Gasang gi, yhangmoq lé, ahoq ahî é yut yut ô nau hkyô má ap pyám bê nghut ri. Yhangmoq é myiwe wuì lhang gi, htûng akying lé tô pyám kômù, haû eq shai é dông htaî lhik pyám nyi akô nghut ri. ²⁷ Haû eq rajung za, yuqgè wuì le, myiwe wuì eq zum é htûng akying lé tô pyám kômù, rayuq eq rayuq, myi su nyé shoq yut yut ô nau lhum kômù, yuqgè yhangchang rayuq eq rayuq agot a-û hkyô kut shut lhum kôluì, yhangmoq kut shut é eq gingdán é yubak dam lé, yhumsing gùng yhumsing hkam yù nyi bekô nghut ri.

²⁸ Hau htoq agó, haû Garai Gasang lé sê é hkyô gi, akyû bo é a nghut ga yhangmoq myit yù kô é yanmai, a kut âng é hkyô kut nhâng râ matú, Garai Gasang gi, yhangmoq lé, htên byoq sê é myit má ap pyám é nghut lhê. ²⁹ Yhangmoq gi, agè agaú hkyô ajung jung, agè ashop hkyô, myoqnoq hkyô eq a jú lhùm é hkyô pé byíng jup tô é bang dut

bekô nghut ri; manon é, byù sat é, mabyoq jishûm htoq é, mhaú zô é eq myit goí bo é pé le byíng bum ri. ³⁰ Yhangmoq gi, lumu é bang, gansang é bang, Garai lé a jú é bang, byù rhoi é bang, nghutbûn é bang, gyáng é bang, agè ashop kut râ hkyô lhoq htoq é bang, mó wui é jìno a gyô é bang nghut akô. ³¹ Yhangmoq gi, a gying a hâng é bang, gidiq a zung é bang, chyit myit a bo é bang, shogyo nhikmyin a sê é bang nghut akô. ³² Haú pé lé kut é bang gi, shí gíng lhê gã é, Garai Gasâng é dingmán tarâ joq é lé, yhangmoq sê to kôlhang, haú pé lé, yhangmoq xoq kut nyi kô é htoq agó, haú hkyô lé kut é bang lé le, hkya-on waq toq akô nghut ri.

2

Garai Gasang Tarâ Jéyáng É Hkyô

¹ Haú mù luí, góyuq lé tarâ jéyáng é sù nàng é, nàng gi, mara mai wó he lut râ hkyô a joq lo; hkâsu mù gã le, nàng yhang jéyáng nyi luí, mù haú pé lé, nàng kut nyi é yanmai, byù góbang lé jéyáng é hkûn, náng gûng nàng mara byi nyi bê nghut ri. ² Haú dông kut nyi é bang lé, Garai Gasang gi, tengmán é dông tarâ jéyáng é lé, nga-nhúng sê nyi lhê. ³ Haú mù, byù za nghut to luí, góbang lé gi, jéyáng mù, yhumsîng gi, haú dông roq châng kut nyi é sù nàng é, nàng gi, Garai Gasâng é tarâ jéyáng hkyô mai wó h pang lut râ su ngam nyi lhê lhú? ⁴ Haú a nghut jáng, nàng gi, Garai Gasâng é ge é hkyo eq nang lé myit wó shuí lhîng nhang é lé a sê é za, Yhâng é agùn agó é ge é hkyô lé le, myit hing é hkyô eq jân shirang é hkyô lé le, wú tiq pyâm nyi lhê lhú?

⁵ Nghut kôlhang, náng é myit htân hkyô eq myit a lêng é nhiklhùm é yanmai, haû Garai Gasang dingmán é dông tarâ jéyáng shit râ nghut é, Yhâng é nhikmo-yô é buinyì má hkâm zo râ nhikmo-yo hkyô lé, yhumsing gùng yhang hkong tô nyì bê nghut ri. ⁶ Garai Gasang gi, yuq hkgangmó lé, ó le ó kut é má cháng luî, hkâm zo nhâng râ nghut lhê. ⁷ Jân shirâng mù, ge é hkyô kut nyi é dông, hpungwup shingkang lé le, aróng eq htên byoq a sê é hkyô lé le, ho é bang lé, Yhang gi, ahtum abyuq é asakbyi râ nghut lhê. ⁸ Nghut kôlhang, haû yhumsing wuizat hkyô za hô luî, tengmán hkyô lé he-ngik pyám mù, agè ashop hkyô lé cháng bâng é matú gi, nhikmo-yo hkyô eq nhikjum yo hkyô jé râ nghut lhê. ⁹ Wuîhke hkyô eq iyon yon hkyô gi, agè ashop kut é xângzo byù yuq hkgangmó chyáng jé râ nghut lhê; sâng-hi má Yudaq byu pê chyáng jé mù, tûngbaù pê chyáng le jé râ nghut lhê. ¹⁰ Nghut kôlhang, hpungwup shingkang, aróng eq nguingón hkyô gi, haû ge é hkyô kut é bang yuq hkgangmó chyáng jé râ nghut lhê: sâng-hi má Yudaq byu pê chyáng jé mù, tûngbaù pê chyáng le jé râ nghut lhê. ¹¹ Hkâsu mù gâ le, Garai Gasang gi, myoqdong a hkyin é Sû nghut lhê.

¹² Haû jep é tarâ lé a sê é mara kut shut é bang lhunglhang gi, jep é tarâ dông a nghut é za htên byoq kó râ nghut lhê. Haû jep é tarâ hkaù má mara kut shut é bang lhunglhang gi, jep é tarâ dông jéyáng é hui zo kó râ nghut lhê.* ¹³ Hkâsu mù gâ le, haû jep é tarâ lé wó gyô é bang lé, Garai Gasâng

* **2:12** Haû jep é tarâ lé a sê bang gâ é gi, tûngbaù pé lé gâ é nghut luî, haû jep é tarâ hkaù má é bang gâ é gi, Yudaq byu pé lé gâ é nghut lhê.

é hí má dingmán bang gâ é a nghut é za, jep é tarâ lé châng kut é bang za sheq, dingmán bang gâ é hui râ nghut lhê. ¹⁴ Haû jep é tarâ lé a wó é tungbaù pé gi, jep é tarâ hkyô lé, yhang baú yhang châng nyi kô é hkûn, jep é tarâ lé a wó kôlhang, yhumsing gùng yhumsing é matú tarâ dut bekô nghut ri. ¹⁵ Yhangmoq gi, haû jep é tarâ hkyô pé lé, yhangmoq é i-myt unghkaû má kê to bê nghut é lé, tân shit bekô nghut mù, yhangmoq é myit má hkâm zô é hkyô le, haú lé saksé hkâm byi nyi é eq, yhangmoq myit é hkyô gi, ahkuî mara hun kat, ahkuî mara hkyut kat kut nyi ri. ¹⁶ Haú hkyô gi, ngò taí pyo é gabú danglù eq rajung za, byu pé é zaú nghop tô é hkyô pé lé, Hkrisduq Yesuq dông mai Garai Gasâng eq tarâ jéyáng é buinyi má dut râ nghut lhê.

Yudaq Byu Pé Eq Jep É Tarâ

¹⁷ Nghut kôlhang, nàng gi, nàng gùng nàng Yudaq byù rayuq nghut lhê ga mù, haû jep é tarâ lé lumhkau nyi é eq Garai Gasang lé xoq é hkyô má nghutbùn nyi é sù; ¹⁸ Yhâng ô nau é hkyô lé sê é eq haû jep é tarâ mhoqshit é hkyô wó yû bê nghut é yanmai, je ahkyak é hkyô lé sê gàm hkoq é sù; ¹⁹ haû jep é tarâ má, hpaqchyî eq tengmán hkyo é alik wó sù nghut é yanmai, haû myoqjit bâng é matú hkyô-u shê sù eq mauchut hkaû mâ é bâng é matú maubó nghut sù; ²⁰ byù ngok pé lé mhoqshit sù eq zoshâng wui é sará nghut sù nghut é lé, sê gyô to sù nghut é nghut le gi, ²¹ nàng, góbang lé mhoq byi sù nhîng, yhumsing gùng yhumsing a mhoq yû lhú? A wó hkau ga hko taí luí nhîng, nàng gi, hkaû lhê a nghut lhú? ²² Su-myi sulàng lú hkyô a wó kut

ga byu pé lé taí luí nhîng, nàng gi, su-myi sulàng lú hkyô kut lhê a nghut lhú? Hparà lhô lé a jú dik sù nàng gi, noqkuq yhûm lé hpyoq zo hpyoq shuq nyi lhê a nghut lhú? ²³ Jep é tarâ eq séng luí nghutbun sù nàng gi, haû jep é tarâ lé lu laî é dông, Garai Gasang lé a hkungga kut lhê a nghut lhú? ²⁴ Haû gi, "Garai Gasâng é myîng gi, nungmoq é yanmai, tûngbaù pê chyáng lhoq hpoí pyâm é huí ri."✧ ga kâ tô é eq rajung za nghut ri.

²⁵ Haû jep é tarâ lé nàng châng é nghut jáng, ahpyo-kuq hpyit hkyô gi, akyû bò bê nghut ri. Nghut kôlhang, nàng, jep é tarâ lé lu laî é nghut jáng, a hpyit é eq rajung za dut bê nghut ri. ²⁶ Ahpyo-kuq a hpyit kôlhang, jep é tarâ hkyô pé lé châng é bang lé gi, ahpyo-kuq hpyit bê bang dông ge sôn byi lhê a nghut kó lhú? ²⁷ Kâ tô é tarâ lé wó mù, ahpyo-kuq hpyit hkam to gù nghut é, tarâ lu laî é sù nàng lé, gungsho má ahpyo-kuq a hpyit kôlhang, jep é tarâ lé châng é sù gi, mara hûn râ nghut lhê.

²⁸ Hkâsu mù gà le, shinggan má za Yudaq byù nghut é sù gi, Yudaq byù kyîng a nghut; gungsho má za ahpyo-kuq hpyit é gi, ahpyo-kuq hpyit kyîng a nghut. ²⁹ Ahte myit hkaù má Yudaq byù nghut sù za, Yudaq byù kyîng nghut lhê. Kâ tô é tarâ dông a nghut é za, Woi-nyí èq myit má ahpyo-kuq hpyit é gi, ahpyo-kuq hpyit kyîng nghut bê. Haú yuq é hkya-on kungtôn hkyô gi, byù mai lo é a nghut, Garai mai lo é ru nghut lhê.

3

Garaî É Lhumzui Hkyô

✧ **2:24** Esai 52:5

¹ Haú dông ga jang, Yudaq byù rayuq dut nyi é gi, hai akyû hkâm zo râ l hú? Ahpyo-kuq hpyit hkyô gi, hai akyû bò râ l hú? ² Hkyô hkangmó má gyai akyû bò l hê! Je hí má gi, haú Garai Gasâng é mungdang lé yhang, yhangmoq lé ap byi bê nghut ri.

³ Yhangmoq mâ é ra-am lumjínq myit a bo é nghut le gi, hkâsu kó l hú? Yhangmoq lumjínq myit a bo é yanmai, Garai Gasâng é lhumzui hkyô lé akyû a bò nhâng wó dut râ l hú? ⁴ Hká dông le a wó dut!

"Haú mù, nàng dang taí é hkûn, dingmán é hkyô wó lhoq htoq râ eq,

nàng jéyáng huí é hkûn, ûng râ nghut l hê."*

ga kê tô é eq rajung za, byù yuq hkangmó gi, byù-mhaú dut kôlhang, Garai Gasang gi, tengmán nyí sháng gaq.

⁵ Nghut kôlhang, nga-nhúng é a dingmán hkyô gi, Garai Gasâng é dingmán hkyô lé san za je lhoq htoq shit é nghut l hê; haú nghut jáng, nga-nhúng hkâsu nghû taí râ l hú? Nga-nhúng lé Garai Gasang nhikmo-yô é hkyô gi, Yhang a tarâ mù nghut l hê l hú? (Ngò gi, byù hkyam dông taí htíng é nghut l hê.) ⁶ Ratsuí l háng a nghut! Haú su ru nghut le gi, haú mingkan lé, Garai Gasang hkâsu wó jéyáng râ l hú? ⁷ Rayuq yuq, "Ngò mhaú é hkyô gi, Garai Gasang tengmán é hkyô lé lhoq ko jat mù, Yhâng é hpungwup shingkang lé je wó lhoq hu nhang é nghut le nhíng, haí mù luí, ngò, yubak byù rayuq dông mara byí é hui zô nyi ra shirâ l hú?" ga taí dang-rháng râ nghut l hê. ⁸ "Ge é hkyô htoq sháng gaq, nga-nhúng, agè ashop hkyô kut sháng." nghû

* 3:4 Hkya-on 51:4

haî mù a taí kô é l hú? Dang haû lé ngamoq taí é nghut lê ga luî, ngamoq lé lumù gansang é dông byù ra-am taí akô. Haú bang gi, mara dam byí é hui zo gíng bang nghut akô.

Dingmán Byù A Nyì

⁹ Haû jáng, hkâsu nghû lo râ l hú? Nga-nhúng gi, je gè bang nghut lê l hú? Ratsuí l háng a nghut. Yudaq byù nghut nghut, tûngbaù pé nghut nghut, yubak mara hkaû mâ é bang chyat nghut lê nghû, ngamoq taí san kyô wú bê nghut lê. ¹⁰ Chyúmdang má kâ tô é le,

"Dingmán é byù a nyì, rayuq l háng a nyì nghut ri;

¹¹ Sê gyô é byù rayuq le a nyì, Garai Gasang lé ho é byù le a nyì nghut ri;

¹² Lhungl háng bang gi, l hing ló byuq bekô; yhangmoq gi, hpau a dap bang chyat dut byuq bekô nghut ri.

Ge é kut sù ó a nyì, rayuq l háng a nyì nghut ri."✧
gâ ri.

¹³ "Yhangmoq é hkyung gi, hpông tô é lup pé nghut akô; yhangmoq é shô gi, mhaû akô."✧

"Yhangmoq é nhutwuî pé má gi, shîduq bò lhangmùi é duq dap bum ri."✧

gâ tô ri.

¹⁴ "Yhangmoq é nhut pé gi, nhing myíng nhing htê eq myit nò danghko baú byíng zan tô ri."✧

gâ tô ri.

¹⁵ "Yhangmoq é hkyî pé gi, byù sat sui lhoq htoq râ matú, lawán nau akô;

✧ **3:12** Hkya-on 14:1-3 ✧ **3:13** Hkya-on 5:9 ✧ **3:13** Hkya-on 140:3 ✧ **3:14** Hkya-on 10:7

16 Yhangmoq sô nyi é hkyô pé gi, htên byoq é eq wuîhkê é ahkô tông tô é nghut mù,
 17 nguingón é hkyô lé gi, yhangmoq a sé kó nghut ri."✧

gâ tô ri.

18 "Yhangmoq é myoq hí má Garai Gasang lé gyuq hkunggâ é hkyô, a bò kó nghut ri."✧
 gâ tô ri.

19 Byù yuq hkanmó é nhut gi, tû tai jang a joq dut byuq mù, mingkan gón gi, Garai Gasâng é hí má mara bo é bang dut nyi sháng gaq ga, haû jep é tarâ má tai é lhungháng gi, jep é tarâ ô má nyi é bang lé tai é nghut é hkyô lé, nga-nhung sê lê.
 20 Haû mù lui, jep é tarâ lé châng é dông mai, ó yuq le, Yhâng é hí má dingmán sù gâ é wó hui râ a nghut; jep é tarâ dông gi, yubak mara bo é hkyô lé wó sê yu é za nghut lê.

Lumjínng Jáng, Dingmán Sù Wó Dut É Hkyô

21 Ahkuî kúm gi, jep é tarâ dông a nghut é za, haû jep é tarâ eq myiqhtoi laiká pé mai saksé hkâm tô é Garai Gasâng chyáng mâ é dingmán hkyô lé, sé nhâng bê nghut ri. 22 Garai Gasâng chyáng mâ é dingmán hkyô haû gi, Yesuq Hkrisduq lé lumjínng é dông mai nghut mù, lumjínng bang banshoq htoq má jé é nghut lê. Gamhkuî é hkyô a joq. 23 Hkâsu mù gâ le, lhunghâng bang gi, yubak mara kut shut bê bang chyat nghut mù, Garai Gasâng é hpungwup shingkang lé a hkyit hkap byuq lo kó nghut ri. 24 Ahkuî kúm gi, Hkrisduq Yesuq mai lo é hkyi yù hkyô dông, Garai Gasâng é jejû èq,

✧ 3:17 Esai 59:7-8

✧ 3:18 Hkya-on 36:1

mara hkyut san byî é laí laí wó hui bê nghut ri. ²⁵ Garai Gasang gi, Yesuq é sui lé lumjínng bâng matú, shíhtaí gunglik hkungga ralhum đông, Yesuq lé byî pyám bê nghut ri. Haû gi, laí lò bê yubak mara lé lhut pyám byi shoq, Garai Gasang myit hîng byi bê nghut é yanmai, Yhâng é tengmán hkyô lé tûn shit é nghut ri. ²⁶ Garai Gasang haû su kut é gi, Yhânggùng yhang dingmán Sû nghut é eq, Yesuq lé lumjínng é sù lé mara hkyut san byî é Sû nghut râ matú, ahkuí lhê ipyat má, Yhâng é tengmán hkyô lé shit byî é nghut lhê.

²⁷ Haû su nghut jáng, nghutbun jowò joq ri l hú? A joq. Hai tarâ mai a joq dut byuq é l hú? Haû jep é tarâ châng é yanmai nghut lhê l hú? A nghut, lumjínng hkyo é yanmai sheq a joq dut byuq é nghut lhê. ²⁸ Hkâsu mù gâ le, byù gi, haû jep é tarâ châng é đông a nghut é za, lumjínng luí, mara hkyut san byi huí é hkyô lé, ngamoq lum nyi lhê. ²⁹ Garai Gasang gi, Yudaq byu pê é Garai Gasang za nghut lhê l hú? Tûngbàu pê é Garai Gasang le a nghut l hú? Nghut lhê, tûngbàu pê é Garai Gasang le nghut lhê. ³⁰ Hkâsu mù gâ le, Garai Gasang gi, rayuq za nghut é yanmai, rajung za lumjínng luí, ahpyo-kuq hpyit hkam é bang lé le, ahpyo-kuq a hpyit é bang lé le, Yhang, mara hkyut san byi râ nghut lhê. ³¹ Haû nghut jáng, nga-nhúng gi, lumjínng myit hau eq, jep é tarâ lé lhoq hpoí pyám râ l hú? Ratsuí l háng a nghut! Nga-nhúng gi, jep é tarâ haû lé lhoq ging tûng é bang ru nghut lhê.

4

Abraham, Mara Hkyut San Huí É Hkyô

¹ Haû su nghut jáng, nga-nhúng é îchýí îwa Abraham gi, haû hkyô mai haî wó sê yu ri nghû, taí râ l hú? ² Abraham gi, zui saî é dông mai, mara hkyut san byi huî é ru nghut le gi, yhang nghutbun jang joq râ nghut lê; nghut kôlhang, Garai Gasâng é hí má gi, yhang haû dông a nghut. ³ Chyúmdang má hkâsu gâ tô ri l hú gâ le, "Abraham gi, Garai Gasang lé lumjúng bê nghut mù, yhang lé, dingmán sủ ga són byi bê nghut ri." ✧ gâ ri.

⁴ Zui saî é sủ gi, yhâng é zuihpau lé, chyunghuq dông wó yu é a nghut é za, wó yủ gíng luî, wó yu é ru nghut lê. ⁵ Nghut kôlhang, zui saî é hkyô dông a nghut é za, haû agè ashop hkyô lé mara hkyut san byi é Garai Gasang lé lumhkau é sủ gi, yhâng é lumjúng myit é yanmai, dingmán sủ ga són byi huî é nghut lê. ⁶ Haû eq rajung za, yhang zui saî é hkyô dông a nghut é za, Garai Gasâng eq dingmán sủ ga són byi huî é, Garai Gasâng chyáng mã é shimân jeju wó é sủ eq séng luî, Dawiq taí é gi,

⁷ "Tarâ lu laî é lé mara hkyut pyám byi huî é eq yubak mara lé nghop pyám byi huî é bang gi, hkungsô wó nyi ri.

⁸ Bo tô é mara lé, Yhumsing eq mara a són byi é hui sủ gi, hkungsô wó nyi ri." ✧ gâ ri.

⁹ Haû sủ é jeju gi, ahpyo-kuq hpyit hkâm bâng é matú za nghut lê l hú? Ahpyo-kuq a hpyit bâng é matú le nghut lê l hú? Hkâsu mù gâ le, Abraham é lumjúng myit lé, dingmán sủ ga són byi bê nghut lê nghû, ngamoq taí nyi bê nghut lê. ¹⁰ Haû su són byi é gi, hkâ-nhám nghut lê l hú? Ahpyo-kuq hpyit

hkâm é htâng má l hú? A nghut jáng, hí má l hú? Haû gi, ahpyo-kuq hpyit hkâm é htâng má a nghut é za, hí má ru nghut lhê. ¹¹ Hau htoq agó, Abraham gi, yhang, ahpyo-kuq hpyit a hkam yù shî é hkûn mai, lumjîng luí wó é dingmán hkyô gâ é dizik nghut é, ahpyo-kuq hpyit masat lé myang hkam yù bê nghut ri. Haû mù, yhang gi, haû ahpyo-kuq hpyit a hkam yù kôlhang, lumjîng é lhunglhâng bang lé dingmán bang ga sôn byî é wó hui râ matú, haú bâng é îwa dut bê nghut ri. ¹² Haû ahpyo-kuq hpyit hkâm é za a nghut, nga-nhûng é îwa Abraham, ahpyo-kuq hpyit a hkam yù shî má wó é lumjîng hkyô é hkyî-kám lé cháng luí ahpyo-kuq hpyit bâng é îwa le, yhang nghut ri.

¹³ Mingkân é amyû hkûng xoq pé dut râ ga, Abraham eq yhâng é awut ashín pé lé byi tô é danggidiq gi, jep é tara é yanmai a nghut é za, lumjîng hkyô mai lo é dingmán hkyô dông ru nghut lhê. ¹⁴ Hkâsu mù gâ le, jep é tarâ dông nyi yap é bang gi, amyû hkûng xoq pé nghut é nghut jáng, lumjîng hkyô gi, akyû a bo é eq, danggidiq gi, hpau a dap é dut byuq lhê. ¹⁵ Haû jep é tarâ gi, nhikmo-yo hkyô lhoq htoq é nghut lhê; nghut kôlhang, jep é tarâ a joq jáng gi, tarâ lu lai hkyô le joq râ a nghut.

¹⁶ Haû mù luí, danggidiq gi, Abraham é awut ashín lhunglhâng bâng chyáng, jeju mai za lo é eq gingtîng nyi é dut sháng gaq ga, lumjîng hkyô mai lo é nghut lhê. Haû gi, jep é tarâ má lôm bâng é matú baú za a nghut, Abraham é lumjîng hkyô má lôm bâng é matú le nghut lhê. Abraham gi, nga-nhúng lhunglhâng bâng é îwa nghut ri. ¹⁷ "Ngò gi,

nang lé, byù myû myô myô é îwa dut nhâng bê."☆
ga kê tô é eq rajung za, haû shi byuq bê bang lé wó
lhoq dui é eq a joq wú é zè lé joq shoq wó kut é,
yhang lumjîng é sũ Garai Gasâng hí má, Abraham
gi, nga-nhûng é îwa nghut lhê.

18 "Náng é awut ashín pé le, haû eq rajung za
myô lò râ nghut lhê."☆ ga yhang lé taî kyô to bê eq
rajung za, yhang gi, myit myoqbyù jowò haî a joq
kôlhang, lumjîng luî myoqbyu nyi é nghut mù, byù
myû myô myô é îwa dut bê nghut ri. 19 Yhang gi,
rashô zàn kê jé byuq bê nghut mù, yhânggùng gi,
shi é gyá dut é hui zô é eq Sarah é zoyhûm shibó
le shum byuq kôlhang, yhang gi, lumjîng myit a
yom byuq nghut ri. 20 Hau htoq agó, Garai Gasâng
é danggidîq eq séng luî, a lumjîng a dut é eq hê
myit mhô myit a dut é za, yhâng é lumjîng myit
lé saî lhoq ging tíng mù, Garai Gasang lé hkya-
on kungtôn luî, 21 Garai Gasang gi, Yhang byî tô
é danggidîq eq rajung za wó kut râ a-tsam bò sũ
nghut é lé, yhang myit zing nyi ri. 22 Hau é yanmai,
"Yhang lé, dingmán sũ ga són byi bê nghut ri."☆
gâ tô é nghut lhê. 23 "Yhang lé, són byi bê." ga,
kê tô é dang gi, yhang é matú za a nghut, 24 nga-
nhûng é Yhumsîng Yesuq lé, shi é mai lhoq dui
toq yû sũ Garai Gasang lé lumjîng luî, Yhang èq
dingmán bang ga són byi râ nghut é, nga-nhûng
é matú le nghut lhê. 25 Yhumsîng Yesuq gi, nga-
nhûng é yubak marâ é matú, shî hkám byi râ dông
ap pyâm é hui luî, nga-nhûng, mara hkyut san byî
é hui râ matú, lhoq dui toq é hui bê nghut ri.

☆ 4:17 Apûn 17:5 ☆ 4:18 Apûn 15:5 ☆ 4:22 Apûn 15:6

5

Nguingón Hkyô Eq Gabú Hkyô

¹ Haû mù luî, nga-nhúng gi, lumjínng é dông mai mara hkyut san byî é hui bê nghut é yanmai, nga-nhúng é Yhumsîng Yesuq Hkrisduq dông, Garai Gasang eq buinùm wó xoq yû bê nghut lhê. ² Yesuq é yanmai, nga-nhúng gi, ahkuî wó yu to bê jeju shî má, lumjínng luî wó wâng bê nghut mù, Garai Gasâng é hpungwup shingkanng lé myoqbyù luî gabú gumrong nyi lhê. ³ Haû za a nghut, nga-nhúng gi, wuîhke jamjau hkyô pé má le gabú gumrong nyi lhê. Hkâsu mù gâ le, wuîhke jamjau hkyô gi, hkam jan hkyô lhoq htoq ri; ⁴ hkam jan hkyô gi, myit a-tsam lhoq htoq lhê; myit a-tsam gi, myoqbyu to hkyô lhoq htoq é lé, nga-nhúng sê lhê. ⁵ Myoqbyu to hkyô haû gi, nga-nhúng lé myit wum gyui nhang é a nghut; hkâsu mù gâ le, Garai Gasang gi, Yhâng é chyitdap myit lé, Yhang mai, nga-nhúng lé byî tô é Chyoiyúng Woi-nyî dông, nga-nhúng é i-myit unghkaû má hut kat byi bê nghut ri.

⁶ Hkâsu mù gâ le, nga-nhúng gi, a-tsam a bò dut tô ashî u lé, ahkyíng hkyak má yhang, Hkrisduq gi, yubak dap bang nghut é nga-nhúng é matú shî hkâm byi bê nghut ri. ⁷ Gè gè ga jáng, dîngmán su é matú shî hkâm byi râ byù gi, shau râ nghut lhê; nghut kôlhang, byù gè rayuq é matú kúm gi, wám shî hkâm é byù nyî sê lhê. ⁸ Nghut kôlhang, nga-nhúng gi, yubak dap bang nghut nyi ashî hkûn, nga-nhúng é matú Hkrisduq shî hkâm byî é má, Garai Gasang gi, Yhâng é chyitdap myit, nga-nhúng lé shit byi bê nghut ri.

⁹ Nga-nhúng gi, ahkuî, Yhâng é sui mai mara hkyut san byî é hui bê nghut mù, Yhâng é yanmai, Garai Gasâng é nhikmo-yo hkyô mai, hkyi yu é je riyhang hui râ nghut lâ. ¹⁰ Hkâsu mù gâ le, nga-nhúng gi, Garai Gasâng é gyè pé nghut nyi ashî u le, Yhâng Zo shî hkám byî é dông, Garai Gasang eq buinùm wó xoq yu é hui bê nghut lâ. Wó xoq yu to bê nghut jáng, nga-nhúng gi, Yhâng é asak dông mai, gè gè yhang hkyi yu é hui râ nghut lâ. ¹¹ Haû su za a nghut, nga-nhúng gi, nga-nhúng é Yhumsîng Yesuq Hkrisduq dông mai, buinùm wó xoq yu é jeju lé, ahkuî wó yu to bê nghut mù, Yhâng é yanmai, Garai Gasang má le, gabú gumrong nyi lâ.

Shi É Gi, Adam É Yanmai, Dui É Asak Gi, Hkrisduq É Yanmai

¹² Byù rayuq dông mai, yubak mara gi, mingkan má jé wâng bê nghut luî, shî-nò hkyô gi, yubak marâ é yanmai châng jé bê nghut ri; haû dông mai, byù lhunghâng bang gi, yubak dap bang chyat nghut byuq mù, shî-nò hkyô gi, byù lhungháng bâng chyáng jé bê nghut ri. ¹³ Hkâsu mù gâ le, haû jep é tarâ lé a byi shimá, yubak mara gi, mingkan má joq to bê nghut lâ. Nghut kôlhang, jep é tarâ a joq shî é hkûn gi, yubak mara lé mara su a ngàm shî é nghut lâ. ¹⁴ Haû su ga kôlhang, Adam su hkunmó lé lu laî é dông mara a kut shut bâng é ahtoq má lhang, shî-nò hkyô gi, Adâm é ipyat mai Mosheq é ipyat jé shoq up nyi bê nghut ri. Adam gi, jé lé lò râ su é azông nghut ri.

¹⁵ Nghut kôlhang, jeju chyunghuq gi, haû mara kut shut é hkyô su a nghut; hkâsu mù gâ le, mara

kut shut é byù rayuq é yanmai, byù myo myo shi pyâm é nghut le gi, Garai Gasâng jeju eq Yesuq Hkrisduq gâ é byù rayuq é jeju mai lo é chyunghuq gi, byù myo myô é htoq má hkâ-í yhang byíng mui nyi ri-nhung! ¹⁶ Garai Gasâng jeju chyunghuq gi, byù rayuq kut é yubak mara su a nghut; hkâsu mù gâ le, tarâ jéyáng é hkyô gi, byù rayuq é mara má cháng mù, mara dam byî é hkyô lhoq htoq é nghut lhê; nghut kôlhang, jeju chyunghuq gi, tarâ lu lai bang myo myo má cháng mù, mara hkyut san byi hkyô lhoq htoq é nghut lhê. ¹⁷ Hau htoq agó, byù rayuq tarâ lu lai luí, haû rayuq é yanmai, shî-nò hkyô up nyi bê nghut lhê, ahkuí kúm, haû Garai Gasâng é agùn agó shimân jeju eq dingmán hkyo é chyunghuq lé hap yu é bang gi, Yesuq Hkrisduq gâ é byù rayuq dông mai, je riyhang asak duì hkyô má uphkang nyi kó râ nghut lhê.

¹⁸ Haû mù luí, tarâ lu lai é hkyô ralhûm é yanmai, byù lhunghâng bang gi, mara dam byî é hui zo kô é su, dingmán hkyo é muzó ralhûm é yanmai, byù lhunghâng bang gi, asak duì hkyô eq sêng é mara hkyut san byi hkyô lé wó bê nghut ri. ¹⁹ Hkâsu mù gâ le, byù rayuq jìno a gyô é yanmai, myo myo gi, yubak dap bang dut byuq é su, byù rayuq jìno gyô é yanmai, myo myo gi, dingmán bang gâ é hui kó râ nghut lhê.

²⁰ Haû jep é tarâ jat é gi, tarâ lu lai hkyô je myo râ matú nghut lhê. Nghut kôlhang, yubak mara myô jat é hkûn, jeju gi, je riyhang myô jat lo é nghut lhê. ²¹ Haû mù, yubak mara gi, shî-nò hkyô dông uphkâng bê su, jeju gi, nga-nhûng é Yhumsîng Yesuq Hkrisduq é yanmai, ahtum abyuq é asak wó

byî é dingmán hkyô dông up râ nghut lê.

6

Hkrisduq Eq Rading Ralhum

¹ Haû nghut jáng, nga-nhúng gi, hkâsu nghû tái râ lú? Jeju myô jat lò sháng gaq nghû, nga-nhúng, yubak mara kut xoq nyi râ lú? ² Haû su a nghut sháng gaq! Nga-nhúng gi, yubak mara eq shi gang bê bang nghut lê; hkâsu mù haú má wó dui nyi lo râ lú? ³ Hkrisduq Yesuq eq rading ralhum za dut râ matú, wui-myhup hkâm yù bê bang nga-nhúng banshoq gi, Yhâng é shî hkám hkyô má le rading ralhum za dut râ matú, wui-myhup hkâm yù bê nghut é lé, nungmoq a sé kó lú? ⁴ Haû mù luí, Hkrisduq gi, Íwâ é hpungwup shingkâng èq, shî bê mai lhoq dui toq huí é su, nga-nhúng le, asak asik dông wó dui nyi sháng gaq nghû, nga-nhúng gi, wui-myhup hkâm é dông, Yhang eq rahá, shî hkâm é eq myhup yhum é hui bê nghut lê.

⁵ Nga-nhúng gi, Yhang shî hkám é hkyô má, Yhang eq rading ralhum za dut bê nghut jáng, Yhâng é dum dui toq hkyô má le, Yhang eq rading ralhum za hkyak dut râ nghut lê. ⁶⁻⁷ Hkâsu mù gâ le, shî bê sù gi, yubak mara mai lhoq lhut é hui bê nghut é yanmai, nga-nhúng gi, yubak marâ é jùn dut nó a ra lo mù luí, yubak mara gùng gi, lhoq htên pyâm é hui râ matú, nga-nhúng é byù xau gi, Yhang eq rahá jén sat pyâm é hui bê nghut é hkyô lé, nga-nhúng sê lê.

⁸ Haû mù, nga-nhúng gi, Yhang eq rahá shî hkám bê nghut jáng, Yhang eq rahá dui nyi râ nghut lê nghû, lumjíngh lê. ⁹ Hkâsu mù gâ le, Hkrisduq gi,

shî bê mai lhoq dui toq é hui bê nghut mù, Yhang gi, dum wó shî lo râ a nghut é lé, nga-nhúng sê lhê; shî-nò hkyô gi, Yhang lé hkâ-nhám le wó sing to râ a nghut lo. ¹⁰ Yhang shî hkâm é shî-nò hkyô gi, banshoq bâng é matú, yubak mara eq séng luî radàm za shî hkám byi bê nghut ri; nghut kôlhang, Yhang dui nyi é asak gi, Garai Gasâng hí má dui nyi é nghut lhê.

¹¹ Haû eq rajung za, nungmoq gi, yubak mara eq shi gang luî, Hkrisduq Yesuq dông Garai Gasâng é matú asak dui nyi lhê nghû, sôn yù keq. ¹² Haû mù luî, nungmoq é htên byoq sê é gungdu má, yubak mara lé hkâ-uphkâng nhâng, uphkâng nhâng kô é nghut jáng, gungdu yut yut ô nau é agè ashop hkyô lé, nungmoq châng é nghut bê. ¹³ Nungmoq é gungdu showui showang pé lé, agè ashop hkýo é chûng zè pé dông yubak mara má hkâ-ap byî pyám kó, shî bê mai lhoq dui toq yû huî é bang su, yhum-sing gùng yhumsing, Garai Gasâng chyáng kúm ap byi keq; nungmoq é gungdu showui showang pé lé, dingmán hkýo é chûng zè pé dông, Garai Gasâng chyáng ap byi keq. ¹⁴ Hkâsu mù gâ le, nungmoq gi, jep é tarâ hkaû má a nghut lô é za, jeju hkaû má nghut nyî bekô yanmai, yubak mara gi, nungmoq lé sîng sù wó dut râ a nghut lo.

Dingmán Hkyo É Jùn Pé

¹⁵ Haû jáng gi, hkâsu kó lú? Nga-nhúng gi, jep é tarâ hkaû má a nghut lo é za, jeju hkaû má nghut nyî bekô yanmai, mara wó kut shut kó râ lú? Haû su a wó kut! ¹⁶ Nungmoq gi, rayuq yuq é jîno gyo râ matú, yhumsing gùng lé jùn pé dông ap pyâm é hkûn, shî-nò hui râ nghut é yubak

marâ é jùn dông nghut kôlhang, dingmán hkyô wó râ nghut é jìno gyo hkyô nghut kôlhang, nungmoq châng nyi é nghut le gi, nungmoq, haú é jùn dut bê lé, a sé kó lú? ¹⁷ Nungmoq gi, yubak marâ é jùn dut wú bê bang nghut kôlhang, nungmoq hkam yu to bê mhoqshit hkyô lé, nungmoq é myit nhiklum banshoq êq châng bekô nghut é yanmai, Garai Gasang lé jeju hkya-on sháng. ¹⁸ Nungmoq gi, yubak mara mai lhoq lhut é hui bang nghut kômù, dingmán hkyo é jùn dut bekô nghut ri.

¹⁹ Nungmoq gi, sê gyô é nyan má wum nyhôm é bang nghut kô é yanmai, byu pé sê gyo râ dông ngò tái râ ga jáng: nungmoq gi, nungmoq é gungdu showui showang pé lé, a sansêng é hkyô eq agè ashop hkyô myô jat nhang é má jùn dông lhang ap byi wú bekô nghut é su, ahkuí gi, chyoyúng hkyô wó yú râ matú, haú pé lé, dingmán hkyô má jùn dông ap byi keq. ²⁰ Nungmoq gi, yubak marâ é jùn dut nyi kô é hkún, dingmán hkyo éq uphkan é mai lut nyi kô é nghut lhê. ²¹ Ahkuí, nungmoq hoqjung nghu wú htoq é pé gi, haú u lé, hai akyú wó yú kô é lú? Hau pé gi, shi byuq é má htúm é chyat nghut ri. ²² Nghut kôlhang, ahkuí gi, nungmoq, yubak mara mai lhoq lhut é hui bekô nghut mù, Garai Gasang é jùn dut bekô nghut ri; hau é akyú gi, chyoyúng hkyô wó yu é nghut mù, ahtum abyuq é asak wó râ nghut lhê. ²³ Hkâsu mù gâ le, yubak marâ é ahpau gi, shi é hkyô nghut ri; nghut kôlhang, Garai Gasang é chyunghuq gi, nga-nhông é Yhumsing Hkrisduq Yesuq é yanmai, ahtum abyuq é asak nghut ri.

7

Tarâ Mai Lut É Hkyô

¹ Gumang wuì ê, ngò gi, tarâ lé sê é bang nungmoq lé taí nyi lhê: haù tarâ gi, byù rayuq lé, yhang, asak dui nyi é u lé za wó uphkanq é lé, nungmoq a sé kó lú? ² Dangké, ikun wàng bê myiwe myhí rayuq gi, yhâng é yhumsîng hpó asak dui nyi é ahkyíng má, tarâ èq up zing tô é hui ri; nghut kôlhâng, yhâng é yhumsîng hpó shi byuq é nghut jáng gi, haù ikun wàng tarâ mai, yhang wó lut bê nghut ri. ³ Haù nghut é yanmai, yhâng é yhumsîng hpó asak dui nyi ashî u lé, yuqgè góyuq eq hâng lhûm é nghut jáng gi, yhang lé, sulàng lú sù ga kó râ nghut lhê. Nghut kôlhâng, yhâng é yhumsîng hpó shi byuq é nghut jáng gi, yhang, tarâ haù mai lut bê nghut luí, yuqgè góyuq eq hâng lhum kôlhâng, sulàng lú sù a nghut lo.

⁴ Haù mù luí, ngá é gumang wuì ê, nungmoq le, haù shi byuq é mai lhoq dui toq yù hui bê sù Yuqgè chyáng wó xoq mù, nga-nhúng gi, Garai Gasang lé ashi wó zui byi sháng gaq ga, Hkrisduq é gungdu dông mai, jep é tarâ eq shi gang bê nghut lhê. ⁵ Hkâsu mù gâ le, nga-nhúng, yubak gungsho má nghut nyi é hkûn, nga-nhúng gi, shî-nò hkyo é ashi zui sháng gaq ga, jep é tarâ é yanmai htoq lo é yubak yut yut ô nau é hkyô gi, nga-nhúng é gungdu pé má mù zui nyi é nghut lhê. ⁶ Nghut kôlhâng, ahkuí gi, nga-nhúng lé up zing tô é jep é tarâ eq shi gang bê nghut mù, jep é tarâ mai lut bê nghut é yanmai, kê tô é hkyô xau dông a nghut é za, Woi-nyí é hkyô sik dông nga-nhúng dojaú nyi é nghut lhê.

Jep É Tarâ Eq Yubak Mara

⁷ Haû jáng, nga-nhúng hkâsu taí râ lú? Jep é tarâ gi, yubak mara nghut lhê lú? Ratsuí lhang a nghut! Gè gè ga jáng, haû jep é tarâ đông mai za a nghut le, yubak mara lé, ngò wó sê é a nghut. Hkâsu mù gâ le, "myoqnoq myit hkâbô"✧ ga jep é tarâ má a taí tô é nghut jáng, myoqnoq é hkyô lé, ngò sé râ a nghut. ⁸ Nghut kôlhang, yubak mara gi, hkunmó é ahkáng lé chùng mù, ngò má myoqnoq hkyô jung hkangmó lhoq htoq byi ri; hkâsu mù gâ le, jep é tarâ hkaû má a nghut jáng, yubak mara gi, shi é za nghut lhê. ⁹ Ngò gi, tarâ hkaû má a nghut é za asak dui wú bê nghut lhê; nghut kôlhang, haû hkunmó htoq lô jáng, yubak mara gi, dui lò mù, ngò gi, shi bê nghut lhê. ¹⁰ Haû mù luí, asak dui nhâng râ matú nghut é hkunmó haû gi, shi-nò hkyô dut byuq é lé, ngò wó sê é nghut lhê. ¹¹ Hkâsu mù gâ le, yubak mara gi, hkunmó é ahkáng lé chùng mù, ngo lé mhaû yù luí, hau èq ngo lé shi nhang ri. ¹² Hau pé lé wú jáng, jep é tarâ gi, chyoiyúng ri; haû hkunmó gi, chyoiyúng, dingmán é eq ge é nghut ri.

¹³ Haû nghut jáng, ge é hkyô haû gi, ngá é matú shi-nò hkyô dut byuq bê lú? Haû đông a nghut! Nghut kôlhang, yubak mara lé gi, yubak mara đông hkyak wó lhoq htoq shit râ matú, haû ge é hkyô đông mai, yubak mara gi, ngò má shi-nò hkyô lhoq htoq bê nghut luí, yubak mara gi, gè gè yhang agè ashop dut é lé, hkunmó đông mai tân shit é nghut lhê.

¹⁴ Hau htoq agó, jep é tarâ gi, woi-nyí eq sêng é hkyô nghut é lé, nga-nhúng sê lhê; nghut kôlhang,

✧ 7:7 Htoq Lô 20:17

ngò má gi, gungsho eq sêng é hkyô za bo é nghut luí, yubak mara má jùn dông ung zô é hui bê nghut lhê. ¹⁵ Ngò haí kut nyi é hkyô lé, ngò a sé. Hkâsu mù gà le, ngò kut nau é hkyô lé gi, a kut é za, ngò a jú é hkyô lé kut é yanmai nghut lhê. ¹⁶ Ngò a kut nau é lé kut é nghut jáng gi, haû jep é tarâ ge é lé, ngò myit huí é nghut lhê. ¹⁷ Ahkuí gi, haû lé ngò yhang kut nyi é a nghut lo, ngò má lúng tô é haû yubak sheq kut é ru nghut lhê. ¹⁸ Ngò má, nghut bê, ngá é yubak gungsho má ge é hkyô haí le a bo é lé, ngò sê lhê. Hkâsu mù gà le, ge é hkyô lé kut nau é myit ngò má bò kôlhang, haû lé a wó kut htoq nghut ri. ¹⁹ Hau é yanmai, ngò kut nau é ge é hkyô lé gi, a kut é za, ngò a kut nau é agè ashop hkyô lé gi, ngò xoq kut nyi ri. ²⁰ Ahkuí, a kut nau é hkyô lé ngò kut nyi é nghut jáng, haû lé ngò yhang kut nyi é a nghut lo é za, ngò má lúng tô é haû yubak sheq haû lé kut nyi é ru nghut lhê.

²¹ Haû mù, ge é hkyô lé ngò kut nau é hkûn, ngò má agè ashop hkyô htoq lô lô mù é tarâ lé, ngò myang ri. ²² Hkâsu mù gà le, ngò gi, Garai Gasâng é tarâ lé, ngá é i-myit unghkaû má myit nguì gabú nyi lhê. ²³ Nghut kôlhang, ngá é gungdu showui showang pé má bo é gotû tarâ gi, ngá é i-myit tarâ eq majan zân lhûm é nghut luí, ngá é gungdu showui showang hkaû má mù zui nyi é yubak é tarâ má, ngo lé shúmbyû dut nhang é lé, ngò myang ri. ²⁴ Ngò gi, shogyo rayhup dut sú nghut ri-nhung! Shí nhang é gungdu shí mai, ó yuq wá, ngo lé wó hkyi yù râ lhú? ²⁵ Nga-nhúng é Yhumsîng Yesuq Hkrisduq dông mai wó lut bê nghut mù, Garai Gasang lé jeju hkya-ôn nyi lhê!

Haû mù luî, ñò yhang, myit é ðông gi, Garai Gasâng é tarâ lé châng lhê, nghut kôlhâng, yubak gungsho ðông gi, yubak é tarâ lé châng lhê.

8

Haû Woi-nyí Mai Asak Dui É Hkyô

¹ Haû mù luî, ahkuî, Hkrisduq Yesuq má nghut nyî bâng é matú gi, mara byî é hkyô a joq lô é nghut lhê. ² Hkâsu mù gâ le, asak dui hkyô eq sêng é Woi-nyí é tarâ gi, Hkrisduq Yesuq ðông, yubak mara eq shî-nò hkyô é tarâ mai, ngo lé lhoq lhut yû bê nghut lhê. ³ Haû jep é tarâ gi, yubak gungshô é yanmai, wum nyhóm luî a wó kut é hkyô lé, Garai Gasang gi, yubak mara hkungga dut nhâng râ matú, yubak byu é gungghyâng ðông, Yhang Zo sîng lé nhang kat é ðông kut pyám bê nghut ri. ⁴ Haû mù, Garai Gasang gi, yubak gungsho ðông asak a dui é za Woi-nyí ðông asak dui bang nghut é nga-nhúng má, haû jep é tarâ má bo é hkyô pé lé, wó lhoq dik râ matú, gungsho ralhum má, mara lé doqđân pyám bê nghut ri.

⁵ Haû yubak gungsho ðông asak dui é bang gi, gungsho yut yut ô nau é hkyô pé lé myit zuq nyi akô; haû Woi-nyí ðông asak dui é bang kúm gi, Woi-nyí ô nau é hkyô pé lé myit zuq nyi akô nghut ri. ⁶ Haû yubak byu é myit gi, shi é hkyô nghut ri; haû Woi-nyí eq hking to huí su é myit kúm gi, asak eq nguingón hkyô nghut ri. ⁷ Haû yubak myit gi, Garaî é tarâ ô má a nyi é htoq agó, haû lé a wó châng kut é yanmai, Garaî é gyè nghut ri. ⁸ Haû yubak gungshô eq hking tô é hui bang gi, Garai Gasang lé a wó gabú nhâng kó nghut ri.

⁹ Nghut kôle, Garai Gasâng é Woi-nyí gi, nungmoq chyáng lúng nyí bê nghut jáng, nungmoq gi, haû yubak gungshô èq hkanq to huí é bang a nghut lô é za, Woi-nyí èq hkanq to huí é bang nghut akô. Rayuq yuq gi, Hkrisduq é Woi-nyí lé a wó é nghut jáng, Hkrisduq eq a sêng é sù nghut lhê. ¹⁰ Nghut kôlhang, nàng má Hkrisduq nyí nyí é nghut jáng, náng é gungdu gi, yubak marâ é yanmai shí kôlhang, náng é woi-nyí gi, dingmán hkyo é yanmai dui nyí ri. ¹¹ Hau htoq agó, Yesuq lé shí é mai lhoq dui toq yû Su é Woi-nyí gi, nungmoq má nyí nyí é nghut jáng, Hkrisduq Yesuq lé shí é mai lhoq dui toq yû Sù gi, nungmoq má nyí nyí é, Yhâng é Woi-nyí đông mai, nungmoq é, shí sê é gungdu pé lé le, asak duì nhâng râ nghut lhê.

¹² Haû mù luí, Gumang wuì ê, nga-nhúng gi, yubak gungsho đông asak duì râ matú, wò wó é bang a nghut. ¹³ Hkâsu mù gâ le, haû yubak gungsho đông asak duì kô é nghut jáng, nungmoq gi, shí râ nghut lhê; nghut kôlhang, haû gungshô é shut shaí hkyô lé, Woi-nyí èq sat pyám kô é nghut jáng, nungmoq gi, asak duì râ nghut lhê. ¹⁴ Garai Gasâng é Woi-nyí èq shuí u é hui bang gi, Garai Gasâng é yhangzô pé nghut lhê. ¹⁵ Hkâsu mù gâ le, nungmoq gi, gyuq râ matú, nungmoq lé jùn dum taû dut nhang é woi-nyí lé, a hap yu é za, nga-nhúng lé zo yín yu é Woi-nyí lé hap yu tô é bang ru nghut lhê; haû mù, nga-nhúng gi, Yhang é yanmai, "Aba,* Âwa ê" nghû wut é nghut lhê. ¹⁶ Nga-nhúng gi, Garai Gasâng é yhangzô pé nghut é lé, Woi-nyí haû gi, nga-nhúng é woi-nyí eq rahá saksé hkâm

* **8:15** Aba gâ é gi, Aramaik dang đông "âwa" gâ é lichyúm nghut lhê.

nyi ri. ¹⁷ Ahkuî, nga-nhúng gi, zo wuî nghut bê yanmai, Hkrisduq eq rahá, Garai Gasâng é amyû hkúngxoq pé wó dut é nghut lâ. Nga-nhúng gi, Hkrisduq é wuîhke jamjau pé lé, gè gè yhang bo hui zô é nghut jáng, Yhâng é hpungwup shing kang lé le, bo myang hkam yù râ nghut lâ.

Htàngnùng Lhê É Hpungwup Shing kang

¹⁸ Nga-nhúng é ahkuî lâ é wuîhke jamjau hkyô pé gi, nga-nhúng lé shit râ nghut é hpungwup shing kang eq whuí râ a gingdán nghú, ngò wó myit ri. ¹⁹ Haû hpan to huí é lhunglhang gi, Garai Gasâng é yhangzô pé lé lhoq htoq shit byi râ lé, gyai yhang myit láng nyi akô nghut ri. ²⁰ Hkâsu mù gâ le, haû hpan to huí é lhunglhang gi, akyû a bo é chyat dut byuq bê nghut ri. Haû gi, yhumsíng hkyin yu é dông a nghut é za, haû su dut nhâng Sû ô nau é dông kut é nghut ri. ²¹ Haû hpan to huí é lhunglhang gi, htên byoq byuq râ matú shúm dut é mai lhoq lhut é hui luí, Garai Gasâng é yhangzo pé é hpungwup bo é luthkyô má wó wâng râ matú, myoqbyu tô é nghut lâ.

²² Haû hpan to huí é lhunglhang gi, ahkuî hkyíng jé shoq, zohkû-nò no é su nò-kying kyíng nyi kô é lé, nga-nhúng sê lâ. ²³ Haû pé za a nghut, Woi-nyí é sâng-hi ashi† lé wó yû bê bang nga-nhúng le, zo pé dông yín yu é jeju lé láng uchyang, i-myit unghkaû má nò-kying kyíng é nghut lâ. Zo pé dông yín yu é jeju haû gi, nga-nhúng é gungdu hkyi xe yù hkyô nghut lâ. ²⁴ Hkâsu mù gâ le, nga-nhúng gi, myit

† **8:23** Woi-nyí é sâng-hi ashi gâ é gi, Woi-nyí gi, Garai Gasang byi é chyunghuq pé mã é sâng-hi lhum nghut lâ.

myoqbyu hkyô haû mai hkyi yu é hui bê nghut lhê. Nghut kôlhang, byu-myang é lé myit myoqbyu é gi, myit myoqbyu é hkyô ratsuí le a nghut. Yhumsing myang to bê é lé, ó yuq wá myit myoqbyu shirâ lhú? ²⁵ Nghut kôlhang, nga-nhung gi, a wó shî é lé myit myoqbyu é nghut jáng, myit hîng hîng kut láng é nghut lhê.

²⁶ Haû eq rajung za, Woi-nyí gi, nga-nhung wum nyhôm é hkyô má garúm byî ri. Nga-nhung gi, haî dung râ é lé a sé kôlhang, haû Woi-nyí yhang gi, dang mai a wó taî htoq é nò-kying htê dông, nga-nhung é matú bo dúng xoq byî ri. ²⁷ Nga-nhung é i-myit unghkaû lé gôn wú é Sû gi, haû Woi-nyí myit é hkyô lé sê lhê, hkâsu mù gâ le, haû Woi-nyí gi, Garai Gasang ô nau é dông, sân-yúng bâng é matú bo dúng xoq byî ri.

Banshoq Lé Je Wó Ung Pyám Râ Hkyô

²⁸ Garai Gasang gi, Yhang myit sôn tô é eq rajung za, ji yù luí, Yhang lé chyitdap bâng é matú, lhunglhang lé ge é dông chyat kut é hkyô lé, nga-nhung sê lhê. ²⁹ Hkâsu mù gâ le, Yhang Zo gi, gumang wuì myo myo má zomún dut sháng gaq ga, Garai Gasang gi, hí te sê tô é bang lé, Yhang Zô é sâmlai eq wó pûng nhâng râ matú, hí mai masat to bê nghut ri. ³⁰ Hau htoq agó, Yhang, hí mai masat to bê bang lé gi, ji yu ri; ji yù bê bang lé gi, mara hkyut san byî ri; mara hkyut san byî é hui bang lé gi, hpungwup shingkang bò nhang ri.

³¹ Haû jáng gi, shí hkyô eq séng luí, nga-nhung haî taî shirâ lhú? Garai Gasang gi, nga-nhung hkyam shut nghut jáng, nga-nhung lé, ó yuq wá gyè wám kut râ lhú? ³² Yhumsing é Yhangzo lé lhang

a ha bûn é za, nga-nhúng banshoq bâng é matú ap byî pyâm é Sû gi, Yhang lé le, lhunglhang lé le, rahá láí láí byi râ a nghut lú? ³³ Garai Gasâng èq hkyin yu to bê bang lé, ó yuq wá mara wó hûn râ lú? Garai Gasang gi, mara hkyut san byi Sû nghut ri. ³⁴ Hkrisduq Yesuq gi, shî hkám luî, shî hkâm é htoq agó, shi é mai lhoq dui toq yu é hui mù, Garai Gasâng é loqyo hkyam má nghut nyî luî, nga-nhúng é matú bo dúng xoq byî nyi bê nghut é yanmai, ó yuq wá mara wó byi râ lú? ³⁵ Hkrisduq é chyitdap myit mai, nga-nhúng lé, hai eq wá wó lhoq kang râ lú? Gunjang huî é hkyo èq luq? Wuîhke huî é hkyo èq luq? Zing-ri huî é hkyo èq luq? Mutmó huî é hkyo èq luq? Gùng chîn dut huî é hkyo èq luq? Gyuq jung èq luq? Sham èq luq? ³⁶ Haû gi,

"Náng é yanmai, ngamoq, nyí wuî sat pyâm é huî nyi ri;

sat râ matú nyhi tô é sau pé lé su, ngamoq lé myit pyâm akô."☆

ga kê tô é eq rajung za nghut ri. ³⁷ A wó lhoq kang; nga-nhúng lé chyitdap Su é yanmai, nga-nhúng gi, haú pé banshoq lé je wó ung pyâm é nghut lhê. ³⁸ Hkâsu mù gâ le, shî kôlhang, byùn kôlhang, mau-mang lagyô pé nghut kôlhang, agè ashop é nat pé nghut kôlhang, shí ipyat nghut kôlhang, htang pyat nghut kôlhang, hai jung a-tsam pé nghut kôlhang, ³⁹ htoq tsáng mâ é nghut kôlhang, a-ô tsáng mâ é nghut kôlhang, hpan tô é gotû haî nghut kôlhang, nga-nhúng é Yhumsîng Hkrisduq Yesuq má bo é Garai Gasâng é chyitdap myit mai, nga-nhúng lé

☆ 8:36 Hkya-on 44:22

wó lhoq kang pyám râ a nghut nghû, ngò gi, hkyak wó sê yu ri.

9

Garai Gasang Hkyin Yu É Israelaq Byu Pé

¹ Ahkuî, ngò gi, Hkrisduq má tengmán é dang tai rá; ngò a mhaû é lé, haû Chyoiyúng Woi-nyí gi, ngá é unghkaû myit má hkyak saksé hkâm nyi ri. ² Ngò gi, ngá é myit nhiklhum má, gyai yhang yón kuq nyi é eq ayang hpuzô nyi lhê. ³ Hkâsu mù gâ le, ngò gi, ngá é byuhú, ngá é gumang wui é matú, nhîng é hui luî Hkrisduq eq gang le lhang gè râ su gâ ri. ⁴ Haú bang gi, Israelaq byu pé nghut lhê. Zo yín yû huî é hkyô le, hpungwup shîngkang le, dangshikaq pé le, tarâ lé myang hap yu é hkyô le, noqkuq yhûm má noqkuq é hkyô le, danggidiq pé lé le, yhangmoq wó yu akô nghut ri. ⁵ Haû myîng hû é îchyí îwâ pé gi, yhangmoq é îchyí îwâ pé nghut luî, byu é hkyam dông gon jáng, Hkrisduq gi, yhangmoq amyû mâ é nghut ri. Yhang gi, lhungháng lé up é, ahtum abyuq hkya-on huî é Garai Gasang nghut ri! Amen.

⁶ Haû gi, Garai Gasâng é danggidiq akôm dut byuq bê nghû nau é a nghut. Hkâsu mù gâ le, Israelaq byu pé banshoq bang gi, Israelaq byù akying chyat a nghut kó nghut ri. ⁷ Abraham é awut ashín banshoq bang gi, yhâng é zo wuî akying chyat nghû a wó tai é nghut lhê. Hau é malaî, "Isak dông mai lo é lé, nâng é awut ashín nghû són byi rá nghut lhê."✧ gâ tô ri. ⁸ Radông tai sháng ga jáng, gungsho mai hku é zo wuî gi, Garai

✧ 9:7 Apûn 21:12

Gasâng é zo wuî akying a nghut kó, danggidiq eq sêng é zo wuî za sheq, Abraham é awut ashín pé dông són byî é nghut lhê. ⁹ Hkâsu mù gâ le, "Masat tô é ahkyíng má, ngò dum taû lé mù, Sarah gi, yuqzo hkû râ nghut lhê."✧ ga taî tô é danggidiq é yanmai nghut lhê.

¹⁰ Haû za a nghut, Rebeka é yhangzô nhiktang é îwa gi, nga-nhúng é îwa nghut su Isak rayuq za nghut lhê. ¹¹⁻¹² Nghut kôlhang, Garai Gasang myit hpyit to mù hkyin yu é hkyô gi, muzó mai a nghut é za, hkyin ji yù Su é yanmai nghut é lé, wó gíng nyì sháng gaq ga, haû zozûm nhik a hku lé shí é htoq agó, ge é eq a ge é muzó haî lhang a kut shimá, "Haû ko sù yuq gi, tiq sù yuq lé dojaú râ nghut lhê."✧ ga, Rebeka lé taî kyô tô é nghut lhê. ¹³ Haû gi, "Yakup lé, ngò chyitdap lhê, nghut kôlhang, Eso lé gi, a ngui é nghut lhê."✧ ga kê tô é eq rajung za nghut ri.

¹⁴ Haû nghut é yanmai, nga-nhúng hkâsu nghû taî râ? Garai Gasang gi, a tarâ é sù nghut lhê lú? Ratsuí lhang a nghut! ¹⁵ Hkâsu mù gâ le, "Ngò, shogyo nhikmyin naù sù lé, shogyo nhikmyin râ nghut lhê;

Ngò, jeju byi naù sù lé, jeju byi râ nghut lhê."✧ ga, Mosheq lé Yhang taî ri. ¹⁶ Haû mù luî, haû hkyin yu é hkyô gi, byù yut yut ô nau é yanmai le a nghut, shikut é yanmai le a nghut, Garai Gasâng é shogyo nhikmyîn é yanmai za nghut lhê. ¹⁷ Hkâsu mù gâ le, Chyúmdang má, "Náng chyáng Ngá é a-tsam wó tân shit râ eq mingkan gón má Ngá é myìng lhoq pyo é hui râ matú sheq, Ngò, nang lé

✧ 9:9 Apûn 18:10,14 ✧ 9:11-12 Apûn 25:32 ✧ 9:13 Mal 1:2-3

✧ 9:15 Htoq Ló 33:19

lhoq toq kat é nghut lhê."☆ ga, Hpara-uq lé tâi ri.
 18 Haû mù luî, Garai Gasang gi, shogyo nhikmyin naù sù lé, shogyo nhikmyin mù, myit lhoq htân byi naù sù lé, myit lhoq htân byi ri.

19 Nungmoq mâ é rayuq yuq, "Haû jáng, Garai Gasang gi, ngamoq lé haî mù mara hun nyi ashî lhú? Yhang ô nau é hkyô lé, ó yuq wá wó hkûm pyâm lhê lhú?" ga, ngo lé taí kó râ nghut lhê.
 20 Nghut kôlhang, Garai Gasang lé dang tu sù byù nàng gi, ó yuq wá nghut lhê lhú? Saî to hui bê é zè pé gi, "Nàng, haî mù ngo lé shî su kut saî tô lhê lhú?" nghû saî é Sù lé wó taí râ lhú? 21 Tso-au saî sù gi, tsohtung ralhum mai za, hkik é tso-au pé eq a hkik é tso-au pé saî râ ahkáng wó lhê a nghut kô lhú?

22 Garai Gasang gi, Yhâng é nhikmo-yo hkyô tân shit luî, Yhang é a-tsam lé sé nhâng naù kôlhang, htên byoq râ matú hen tô é, nhikmo-yo gíng é tso-au pé lé, myit hîng hîng shirang pyâm nyi é hkyô lé, taí râ jang haî joq ashî lhú? 23 Hpungwup shíngkâng é matú noq mai hen to bang nghut é, Yhang shogyo nhikmyin huî é bang lé, Yhâng é agùn agó é hpungwup shíngkang lé sé nhâng naù mù, Yhang haû su kut é nghut jáng, taí râ haî joq ashî lhú? 24 Haû bang gi, Yudaq byu pé mai za a nghut, tûngbaù pé mai le ji yù huî é bang nganhúng nghut lhê. 25 Haû eq rajung za, Hosea laiká má Yhang taî tô é gi,

"Ngá é byù myû a nghut é bang lé, 'Ngá é byù myû' nghû;

☆ 9:17 Htoq Ló 9:16

Ngò a chyit é byizo lé 'Ngò chyit sù' nghû wut
râ nghut lhê."✧

gâ ri. ²⁶ Haû mù,

"Nungmoq gi, ngá é byù myû pé a nghut.' nghû
yhangmoq lé taí é jowò má yhang,
yhangmoq gi, 'Rû dui nyi é Garai Gasâng yhangzô
pé' ga wut é hui kó râ nghut lhê."✧

gâ ri.

²⁷ Esai-aq le, Israelaq byu pé eq séng luí garu taí
é gi,

"Israelaq yhangzo yhangshû pé gi, wuìshuq lung-
aû yàm mâ é semuî su myo kôhang,
myit gyó tô é bang za sheq hkyi yu é hui kó râ
nghut lhê.

²⁸ Hkâsu mù gâ le, haû Yhumsîng gi, myidàm htoq
má Yhâng é tarâ jéyáng hkyô lé hân hân lhoq
dik lhoq htûm pyâm râ nghut lhê."✧

gâ ri.

²⁹ Haû eq rajung za, hí lé Esai-aq taí tô é gi,
"A-tsam dik shoq bò sù haû Yhumsîng za, nga-
nhúng lé, awut ashín a myhit to byi é nghut
jáng,

nga-nhúng gi, Sodom wà su dut byuq luí, Go-
moraq myuq eq pung byuq râ nghut lhê."✧

gâ ri.

Israelaq Byu Pé A Lumjîng Kô É Hkyô

³⁰ Haû mù, nga-nhúng hkâsu nghû taí râ lhú?
Dingmán hkyô lé a châng hkat é tûngbau pé gi, haú
lé wó yù bekô; haû gi, lumjîng hkyo é yanmai wó
yu é dingmán hkyô nghut ri. ³¹ Nghut kôhang, tarâ

✧ 9:25 Hos 2:23 ✧ 9:26 Hos 1:10 ✧ 9:28 Esai 10:22-23 ✧ 9:29
Esai 1:9

eq sêng é dingmán hkyô lé châng hkat é Israelaq byu pé gi, haú lé a wó yù kó nghut ri. ³² Haú mù a wó yù kô é lú? Yhangmoq gi, lumjǐng myit èq châng hkat kô é a nghut é za, muzó pé èq châng hkat kô é yanmai, a wó yù kô é nghut ri. Yhangmoq gi, "htung htê râ luqgok" má htung leng bekô nghut ri. ³³ Haú,

"Wú keq, htung leng râ luqgok eq myit leqbat nhâng râ luqmó cham lé, Ngò, Zi-un bùm má lheq to luí,

Yhang lé lumhkaú sù gi, hkâ-nhám le hoq hpu é hui râ a nghut."✧

ga kâ tô é eq rajung za nghut ri.

10

¹ Gumang wuì ê, ngò gi, haú Israelaq byu pé hkyi yu é hui kó sháng gaq nghú, gyai yhang myit shirông luí, Garai Gasâng chyáng yhangmoq é matú kyûdung byí nyi lhê. ² Hkâsu mù gâ le, yhangmoq gi, Garai Gasâng é hkyô lé gyai yhang myit zuq é bang nghut é lé, ngò saksé hkâm lhê; nghut kôlhang, yhangmoq myit zuq é hkyô gi, hpaqchyí bo é dông a nghut kó. ³ Yhangmoq gi, Garai Gasâng chyáng mai jé lé é dingmán hkyô lé a sé kômù, yhumsîng dingmán bûn é hkyô lé za ho shikut nyi kô é yanmai, Garai Gasâng é dingmán hkyô hkaú má a nyi kó nghut ri. ⁴ Hkrisduq gi, lumjǐng bang yuq hkgámó, dingmán é má wó jé kó sháng gaq ga, jep é tarâ ló htûm jang dut bê nghut ri.

⁵ Mosheq gi, "Haú pé dông châng é sù gi, haú pé mai asak duì râ nghut lhê."✧ ga, jep é tarâ eq sêng é

dingmán hkyô lé kê sân kyô tô é nghut lê. ⁶ Nghut kôlhang, lumjínq hkyô eq sêng é dingmán hkyô gi, "Náng é myit nhiklhú má, 'Mauhking má, ó yuq doq lô râ lú?'[☆] (Haú gi, Hkrisduq lé shuí gyó lô râ gá nau é nghut lê), ⁷ haú a nghut jáng, 'Nik é jang má, ó yuq gyó wâng râ lú?'[☆] (Haú gi, Hkrisduq lé, shi é mai dui toq nhâng râ gá nau é nghut lê.), nghú hkâtaí kó." gâ tô ri. ⁸ Haú jáng, hkâsu gâ tô ri lú? "Haú mungdang gi, nâng eq chyâng nyi ri; nâng é nhut má le, nâng é myit nhiklhú má lé nghut nyi ri."[☆] gâ tô ri. Haú gi, ngamoq hko taí é lumjínq hkyô eq sêng é mungdang nghut lê. ⁹ Haú mù, "Yesuq gi, Yhumsing nghut ri." nghú nâng é nhut eq yín yû mù, Garai Gasang gi, Yhang lé, shi é mai dui toq nhâng bê nghut lê nghú, nâng é myit nhiklhú má lumjínq é nghut jáng, nâng gi, hkyi yu é hui râ nghut lê. ¹⁰ Hkâsu mù gâ le, byù gi, myit nhiklhú má lumjínq jáng, mara hkyut san byí é hui mù, nhut mai yín yû jáng, hkyi yù huí é nghut lê. ¹¹ Haú Chyúmdang taí é gi, "Yhang lé lumhkau é sù ó yuq le, hkâ-nhám lhang hoq hpû é hui râ a nghut."[☆] gâ ri. ¹² Hkâsu mù gâ le, Yudaq byù eq tûngbaù pê é gyoro má gam hkoq é hkyô haí le a joq é za, haú Yhumsing gi, banshoq bâng é Yhumsing nghut lê mù, Yhang lé wut dung bang lhunglhang lé, agùn agó shimân byí ri. ¹³ Hkâsu mù gâ le, "Haú Yhumsing é mying lé lhang é bang yuq hkangmó gi, hkyi yu é hui râ nghut lê."[☆] gâ tô ri.

¹⁴ Haú nghut lé gi, yhangmoq a lumjínq é sù lé nhing, hkâsu wó wut dung kó râ lú? Yhangmoq

☆ **10:6** Tarâ Pun 30:12 ☆ **10:7** Tarâ Pun 30:13 ☆ **10:8** Tarâ Pun 30:14 ☆ **10:11** Esai 28:16 ☆ **10:13** Yol 2:32

a wó gyô wú é sù lé nhîng, hkâsu wó lumjîng kó râ l hú? Hko kyô é sù a nyi le nhîng, hkâsu wó gyo kó râ l hú? ¹⁵ Nhang kat é a hui le gi, yhangmoq hkâsu kut wó hko kyo kó râ l hú? Haû eq rajung za, "Gabú danglù pé hko kyo bâng é hkyî-kám pé gi, hkâ-í yhang yúng ri myhi-nhung!"[☆] ga kê tô ri.

¹⁶ Nghut kôlhang, Israelaq byu pé banshoq bang gi, gabú danglù lé hap yù kô é a nghut. Hkâsu mù gâ le, Esai-aq gi, "Yhumsîng ê, ngamoq é danglù lé ó yuq wá lumjîng é l hú?"[☆] ga tâi ri. ¹⁷ Haû nghut mù lúi, lumjîng myit gi, danglù lé wó gyô é mai lò mù, danglù gyô yu é gi, Hkrisduq é mungdang mai lo é nghut lhê. ¹⁸ Nghut kôlhang, ngò myi kó lé: yhangmoq gi, a wó gyô wú kô é nghut lhê l hú? Yhangmoq gi, wó gyo gù za nghut lhê, haû eq rajung za,

"Yhangmoq é htê gi, myidàm htoq banshoq má jàm bê nghut ri;

yhangmoq é mungdang pé gi, mingkan htungchyûn hkangmó má jé bê nghut ri."[☆]

gâ tô ri. ¹⁹ Ngò dum myi kó lé: Israelaq byu pé gi, a sê gyo kô é nghut lhê l hú? Mosheq sâng-hi má tâi é gi,

"Byù rahú l háng a nghut bang èq, Ngò, nungmoq lé manôn nhâng râ;

sê gyo nyan a bo é amyû èq, Ngò, nungmoq lé wú nhik-yo nhâng râ nghut lhê."[☆]

gâ ri. ²⁰ Hau htoq agó, Esai-aq a gyuq a wàm tâi é gi,

[☆] **10:15** Esai 52:7 [☆] **10:16** Esai 53:1 [☆] **10:18** Hkya-on 19:4

[☆] **10:19** Tarâ Pun 32:21

"Ngo lé a ho é bang gi, Ngo lé myang hô bekô nghut ri;
 Ngá hkyô lé a myî é bang lé, Ngò htoq shit bê nghut lhê."[✧]
 gâ ri. ²¹ Nghut kôlhang, Israelaq byu pé eq séng luî, Yhang taî é gi,
 "Ngò gi, jìno a gyô é eq ngegáng-htu é byù myû lé, nyí wuî Ngá loq lham mù ji nyi lhê."[✧]
 gâ ri.

11

Israelaq Byu Pé Lé A He-ngik Pyám

¹ Haû mù luî, ngò myi kó lé, Garai Gasang gi, Yhâng é byu pé lé he-ngik pyám bê nghut lhê lhú? Ratsuí lháng a nghut! Ngò yhang le, Israelaq byù myû nghut luî, Abraham é awut ashín eq Ben-yamyin hú mâ é sù nghut lhê. ² Garai Gasang gi, Yhang te sê to gû nghut é, Yhâng é byu pé lé a he-ngik pyâm é nghut lhê. Eliyaq eq séng é hkyô Chyúmdang má bo tô é lé, nungmoq a sé kó lhú? Garai Gasâng é hí má, yhang, Israelaq byu pé lé mara hûn é gi, ³ "Yhumsîng ê, yhangmoq gi, Náng é myiqhtoî pé lé sat pyám kô é eq Náng é hkungga gyap pé lé tu lhêng pyâm akô nghut ri; ngò rayuq za myit gyó tô é nghut luî, ngo lé sat râ matú le yhangmoq ho nyi akô nghut ri."[✧] gâ ri. ⁴ Garai Gasang gi, yhang lé, hkâsu ga tû taî é nghut lhê lhú? Haû gi, "Balaq hpara é hí má hkyihput a htuq shî é byù nyhit hkyíng lé, Ngá é matú myhit to lhê."[✧] gâ é nghut lhê. ⁵ Haû eq rajung za, ahkuî gi, jeju

✧ 10:20 Esai 65:1 ✧ 10:21 Esai 65:2 ✧ 11:3 1 Hko 19:10,14

✧ 11:4 1 Hko 19:18

yanmai hkyin yù huî é bang za myit gyó tô é nghut lhê. ⁶ Jeju yanmai nghut é nghut le gi, muzó é yanmai a nghut lo; muzó dông ru nghut le gi, jeju gi, jeju a nghut lo.

⁷ Haû nghut jáng, hkâsu lhú? Israelaq byu pé gyai ho shikut kôlhang, a wó kô é lé, hkyin htoq yù huî é bang kúm gi, wó bekô nghut ri. Góbang gi, myit lhoq htân byî é hui akô nghut ri; ⁸ haû gi, "Garai Gasang gi, hkû-nyí jé shoq, yhangmoq lé nhikshî jit é woi-nyí lé le, a wó myang é myoqjí lé le, a wó gyô é nohkyap lé le, byî to bê nghut ri."✧

ga kâ tô é eq rajung za nghut ri. ⁹ Dawiq taî é le, "Yhangmoq é zangbó gi, yhangmoq é matú, dumzo eq lhaí, myit leqbat jowò eq lató hpuq hkyô dut sháng gaq;

¹⁰ Yhangmoq myoq a wó myâng shoq, myoqjí lhoq chut pyám byî é hui sháng gaq; yhangmoq é nunghkûng gi, ayang wòlai wun goí nhang é hui sháng gaq."✧
gâ ri.

Tûngbaù Pé Lé Hkyi Yu É Hkyô

¹¹ Ngò dum myi kó lé: Israelaq byu pé gi, a wó dum gè râ í leqbat byuq bekô lhú? Ratsuí lhang a nghut! Yhangmoq é tarâ lu lai hkyo é yanmai, yhangmoq lé manôn nhâng râ matú, hkyi yù hkyô gi, tûngbaù pê chyáng jé byuq é nghut lhê. ¹² Nghut kôlhang, yhangmoq é tarâ lu lai hkyô gi, mingkân é matú wó sùt hkyô eq, yhangmoq sum pyâm é hkyô gi, tûngbaù pê é matú wó sùt hkyô dut é nghut jáng,

✧ **11:8** Tarâ Pun 29:4 ✧ **11:10** Hkya-on 69:22-23

yhangmoq é byíng jup hkyô gi, je riyhang kô é wó sùt hkyô dut râ nghut ri-nhung!

¹³ Nungmoq tûngbaù pé lé ngò taí nyi lhê: ngò gi, tûngbaù pê é lagyo nghut nyi é u má, ngá é hpungmû lé hpautap nyi lhê. ¹⁴ Haù gi, ngá é amyû pé lé manôn myit wó bô nhâng mù, yhangmoq ra-am lé wó hkyi yù râ lé myit myoqbyu é hkyô nghut lhê. ¹⁵ Hkâsu mù gâ le, yhangmoq lé he-ngik pyâm é hkyô gi, mingkân é matú Garai eq buinùm xoq hkyô dut bê nghut jáng, yhangmoq lé dum hap yu é hkyô gi, shi é mai dui toq é dông dut bê a nghut lhi? ¹⁶ Hau htoq agó, sâng-hî ashi dông nhông byi é mún ra-am gi, chyoiyúng é nghut jáng, muk htung gón gi, chyoiyúng é nghut lhê; haù amyit gi, chyoiyúng é nghut jáng, akoq pé le chyoiyúng é nghut lhê.

¹⁷ Haù tsanlun akoq pé* ra-am gi, lhoq hkyui pyâm é hui luî, yosô tsanlun a-nyuq† nghut sù nàng gi, haù pé má xoq é hui mù, haù tsanlun amyit é xù lé bo shuq lom é nghut jáng, ¹⁸ akoq haù pé lé hkâwú tiq pyám kó. Nungmoq haù su kut é nghut jáng, nungmoq gi, haù amyit lé htuq é a nghut é za, amyit haù sheq nungmoq lé htuq é hkyô lé, nungmoq myit sé keq. ¹⁹ Nungmoq kúm gi, "Ngò, haù má xoq é hui râ matú sheq, akoq haù pé gi, lhoq hkyui pyâm é huí é ru nghut lhê." ga taí râ nghut lhê. ²⁰ Haù su gi, nghut lhê. Nghut kôlhang, yhangmoq gi, a lumjíng é yanmai, lhoq hkyui pyâm é hui kômù, nungmoq kúm gi, lumjíng é yanmai, wó ging tîng nyi é nghut lhê. Hká

* **11:17** Tsanlun akoq pé gi, Israelaq byu pé lé taí nau é nghut lhê.

† **11:17** Yosô tsanlun a-nyuq gi, tûngbaù pé lé taí nau é nghut lhê.

gumrong nyi, gyuq kyum nyi keq. ²¹ Hkâsu mù gâ le, Garai Gasang gi, akoq akying pé lé a ha bûn é nghut le gi, nungmoq lé le ha bun râ a nghut.

²² Haû mù luî, Garai Gasâng é shogyo nhikmyin hkyô eq htân htân kut pyâm é hkyô lé, myit wú keq: leqbat é bang lé htân htân kut pyám kôlhang, nungmoq gi, Yhâng é shogyo nhikmyin hkyô má xoq nyi nyi é myhâng, nungmoq lé gi, shogyo nhikmyin nyi râ nghut lhê. Haû a nghut jáng, nungmoq le, zân hpyit pyâm é hui râ nghut lhê. ²³ Yhangmoq gi, a lumjîng hkyô lé tô pyám kô é nghut jáng, dum xoq yu é hui kó râ nghut lhê; hkâsu mù gâ le, Garai Gasang gi, yhangmoq lé dum wó xoq yu é Sû nghut lhê. ²⁴ Haî mù gâ le, yosô tsanlun gàm akoq nghut gù nungmoq lé hpyit yû mù, htûng a nghut é dông, hô é tsanlun agàm má xoq é nghut le gi, haû akoq akying pé nghut é yhangmoq gi, ó le ó é tsanlungut akying má xoq yu é lé je riyhang hui râ nghut lhê ô!

Israelaq Byu Pé Hkyi Yu É Hui Râ Hkyô

²⁵ Haû mù, gumang wuî ê, nungmoq a nghutbun kó sháng gaq nghû, zau tô é hkyô shî lé, nungmoq a sé dut râ lé, ngò a ô nau é nghut lhê: haû gi, tûngbaù pé wang lo é laké byîng é hkûn jé shoq, Israelaq byu pé ra-am gi, myit lhoq htan é huî é hkyô nghut lhê. ²⁶ Hau htâng sheq, Israelaq amyû banshoq bang hkyi yu é hui râ nghut lhê. Haû gi, "Hkyi yù Sû gi, Zi-un bùm mai htoq lô râ nghut lhê; Yhang gi, Garai lé nunghtáng tô pyâm é hkyô lé, Yakup é awut ashín mai huî sêng pyám byi râ nghut lhê.

27 Ngò, yhangmoq é yubak mara lé huí sêng pyám
byi jáng,
haû gi, yhangmoq lé Ngò byî tô é Ngá é dang-
shikaq nghut lhê."[✧]
ga kê tô é eq rajung za nghut ri.

28 Haû gabú danglù eq séng luí ga jang, yhang-
moq gi, nungmoq é matú gyè nghut akô; nghut
kôlhang, hkyin htoq yû hkyô eq séng luí ga jang,
yhangmoq gi, myìng hû é îchyí îwa pê é yan-
mai, chyitdap é huí akô nghut ri; 29 hkâsu mù
gâ le, Garai Gasâng é chyunghuq pé eq Yhang
jî yu é hkyô lé gi, wó htaî lhik pyâm é a nghut.

30 Nungmoq gi, Garai Gasâng é jìno a gyô é bang
radàm dut wú kô é nghut kôlhang, yhangmoq jìno a
gyô é yanmai, ahkuí kúm, shogyo nhikmyin hkyô
wó hkam yù bekô nghut é su, 31 ahkuí, yhangmoq
gi, nungmoq wó hkam yu é Garai Gasâng é shogyo
nhikmyin hkyo é yanmai, shogyo nhikmyin hkyô
lé wó hkam yù kó sháng gaq ga, yhangmoq le,
ahkuí, jìno a gyo bang dut bekô nghut ri. 32 Hkâsu
mù gâ le, Garai Gasang gi, byù lhunghâng bang
lé, shogyo nhikmyin hkyô wó tân shit shoq ga,
lhunghâng bang lé, jìno a gyo hkyo é shúm dut
nhang to bê nghut ri.

Hkya-on Kungtôn Dang

33 Ô! Garai Gasâng é agùn agó é sùt nghut é,
hpaqchyî byéng-yá eq nyan hpaqchyî gi,
hkâ-í yhang nik ri-nhung!
Yhâng é tarâ jéyáng hkyô gi, ung sê jung a nghut
nhung!

[✧] 11:27 Esai 59:20-21; 27:9

Yhang kut é hkyô pé gi, hkâ-í yhang ho htoq
wui jung nghut ri-nhung!

34 "Haû Yhumsing é myit lé, ó yuq wá ung sê lhê
lhú? Yhâng é hpaqchyî byi sù gi, ó yuq wá
dut wú é lhú?"[☆]
gâ ri.

35 "Garai Gasâng eq jeju dum tau byi râ dut shoq, ó
yuq wá, Garai Gasang lé byî wú é lhú?"[☆]
gâ ri.

36 Hkâsu mù gâ le, joq mijoq gi, Yhâng chyáng mai
nghut mù, Yhang dông mai nghut lui,
Yhâng é matú chyat nghut ri. Haû hpungwup
shing kang gi,

Yhâng chyáng ahtum abyuq ru joq nyî sháng gaq ô!
Amen.

12

Dui É Hkungga Pé Dut Râ Hkyô

¹ Haû mù lui, gumang wui ê, nungmoq é gungdu
pé lé, Garai Gasang myit nguì ô nau é eq chyoiyúng
é, dui é hkungga dông nhông byi keq nghû, Garai
Gasâng é shogyo nhikmyin hkyô mai, ngò, nung-
moq lé wum byî kat lhê. Haû gi, woi-nyí hkyô
dông nungmoq noqkuq dojaú é hkyô nghut lhê.

² Míngkan shí lhûm é sâmlai dông a cháng lo é za,
myit sik wó yû râ dông nungmoq é a-kyang lé htaí
pyám byi nhâng keq. Haú hkûn sheq, Garai Gasâng
é ge é, myit nguì é eq gumjup é ô nàu hkyô lé,
nungmoq wó chyâm, wó sê gàm hkoq yû kó râ
nghut lhê.

☆ 11:34 Esai 40:13 ☆ 11:35 Yob 41:11

³ Hkâsu mù gâ le, ngo lé byî tô é jeju yanmai, nungmoq yuq hkanmó lé ngò taí kôlé: nungmoq gi, yhumsing gùng lé lai shoq a nghutbûn é za, ó le ó lé, Garai Gasâng èq lumjǐng myit tsing gàm byî to bê eq rajung za, myit yù gǐng é í za myit yù keq. ⁴ Nga-nhúng yuq hkanmó é gungdu ralhum má gi, gungdu showui showang pé myo myo bo é nghut luî, gungdu showui showang háu pé banshoq gi, jai chûng jang a pung é nghut lhê. ⁵ Haû eq rajung za, myo myo nghut é nga-nhúng le, Hkrisduq má gungdu ralhum za dut luî, yuq hkanmó gi, rayuq eq rayuq gungsho sêng lhûm é bang chyat nghut lhê. ⁶ Nga-nhúng lé byî tô é jeju yanmai, nga-nhúng wó é chyunghuq gi, gotû tú nghut lhê. Byù rayuq é chyunghuq gi, myiqhtoi htoî é nghut jáng, yhâng é lumjǐng hkyô eq rajung za htoi sháng gaq; ⁷ dojaú é nghut jáng, dojaú sháng gaq; mhoq kyô é nghut jáng, mhoq kyo sháng gaq; ⁸ myit wum byî é nghut jáng, myit wum byi sháng gaq; ra châ é bang lé garúm byî é nghut jáng, a ha bûn é za byi sháng gaq; shuî u é nghut jáng, lumluq tung shuî u sháng gaq; shogyo nhikmyin hkyô shit é nghut jáng, gabú myit èq kut sháng gaq.

Chyitdap Myit

⁹ Chyitdap myit má gegùn labyoq a ge bò. Agè ashop dut é lé, nhik noq pyám keq; ge é lé, myit tuî nyî keq. ¹⁰ Rayuq eq rayuq, gumang chyitdap myit mai lhumzû lhum keq. Rayuq eq rayuq, yhumsing gùng htoq je hpautap lhum keq. ¹¹ Myit zuq hkyô má, hkâ-nhám le wum a lhoq shôm é za, nungmoq é woi-nyî hkyô má myit toq nyî mù, haû Yhumsîng lé dojaú nyî keq. ¹² Myit myoqbyù

hkyô má gabú keq; wuîhke hkyô má hkam jan keq; kyûdung hkyô má lhumzui keq. ¹³ Ra châ tô é Garai Gasâng é byu pé lé gàm byi keq. Bíng hkulum é lé rago kut keq.

¹⁴ Nungmoq lé zing-rî é bang lé shimân byi keq; shimân byi keq, hkâ-nhing kó. ¹⁵ Gabú é bang eq rahá bo gabú keq; yón é bang eq rahá bo yón keq. ¹⁶ Rayuq eq rayuq byin hpyé gohut huî nyi keq. A nghutbûn é za, nyi yap hkyô nyhûm bang eq zûm yap keq. Hpaqchyî bo é sù su hkâ-myt ngàm kó.

¹⁷ Ó yuq lé le, agè ashop é yanmai, agè ashop é dông lató hkâhpuq kó. Yuq hkangmó é myoq hí má ge é lé kut râ rago myit keq. ¹⁸ Wó dut é nghut jáng, nungmoq wó dut é í, yuq hkangmó eq nuingón shoq nyi keq. ¹⁹ Ngá é buinùm wuî ê, lató a hpuq é za, Garai Gasâng é nhikmo-yo hkyô lé sheq lánng nyi keq. Hkâsu mù gâ le, "Ngò sheq lató hpuq râ sù nghut lhê; ngò lató hpuq râ."✧ ga, haû Yhumsîng taî ri ga kê tô ri. ²⁰ Haû mù,

"Nungmoq lé gyè kut sù zòmut é nghut le gi, byi tso keq; yhang wuîshit é nghut le gi, rajung jung byi huq keq.

Haû dông kut jáng, nàng, yhâng é ulhum htoq má gyúng é myigye bum to byî é nghut lhê."✧ ga le kê tô ri. ²¹ Agè ashop é gi, nungmoq lé a ung pyám sháng gaq, ge é hkyo èq agè ashop é lé ung pyám keq.

13

Ahkáng Ayá Wó Bâng Ô Má Nyi Râ É Hkyô

¹ Yuq hkanmó gi, up é ahkáng ayá wó bâng é a-ô má nyi ra râ nghut lhê; hkâsu mù gâ le, Garai Gasâng chyáng mai za a nghut le gi, up é ahkáng ayá joq é a nghut. Joq tô é ahkáng ayá pé gi, Garai Gasâng èq byî tô é chyat nghut lhê. ² Hau é yanmai, up é ahkáng ayá lé gumlau toq é sù gi, Garai Gasang byî tô é up é ahkáng ayá lé gumlau toq é sù nghut ri; haû su kut é bang gi, tarâ jéyáng é hui zo râ hkyô lé ho yù nyi é bang nghut akô. ³ Hkâsu mù gâ le, uphkan é bang gi, ge é hkyô kut bâng é matú gyuq nán hpo a dut é za, shut shaî hkyô kut bâng é matú sheq dut é ru nghut lhê. Up é ahkáng wó sù lé gyuq é mai lut nau lhê a nghut lí? Haû jáng, ge é hkyô kut aq, haû hkûn, yhang, nang lé hkya-on râ nghut lhê. ⁴ Hkâsu mù gâ le, yhang gi, náng é matú ge é akyû kut byi râ nghut é, Garai Gasâng é dui-nhâng zoshâng nghut lhê. Nghut kôhang, nàng, shut shaî hkyô kut é nghut le gi, gyuq nán nyi aq; haî mù gâ le, yhang gi, sâm lé ajè wun tô é a nghut. Yhang gi, Garai Gasâng é dui-nhâng zoshâng nghut mù, shut shaî hkyô kut sù lé dam byi râ matú nhikmo-yo Su é gunglik nghut lhê. ⁵ Haû mù luî, dam byi râ lé chiq é yanmai za a nghut, yhumsîng nhik bô râ é yanmai le, haû up é ahkáng ayá wó bâng é a-ô má nyi râ dut lhê.

⁶ Nungmoq hkansê kat râ é gi, hau é yanmai le nghut lhê; hkâsu mù gâ le, haû up é ahkáng ayá wó bang gi, Garai Gasâng é dui-nhâng zoshâng wui nghut lhê mù, uphkan é mù lé, ahkyîng byîng shoq wùn waq nyi akô nghut ri. ⁷ Yuq hkanmó lé byi âng é eq rajung za byi keq: hkansê kat byi ang sù lé gi, hkansê kat byi keq; kang kat byi ang sù lé

gi, kang kat byi keq; gyuq kyum ang sù lé gi, gyuq kyum keq; hkungga ang sù lé gi, hkungga keq.

Rayuq Eq Rayuq Chyitdap Lhum Râ Hkyô

⁸ Rayuq eq rayuq chyitdap lhûm é chyîn mai lai luî, hai chyîn le hkâdap lhûm kó; hkâsu mù gâ le, góyuq lé chyitdap é sù gi, haû jep é tarâ lé lhoq dik bê sù nghut ri. ⁹ "Su-myi sulàng lú hkyô hkâkut," "Byù hkâsat," "Hkâhkau," "Hkâ-myoqnoq,"* gâ tô é hkunmó pé eq gotû hkunmó haî nghut nghut, "Náng gûng lé nàng chyitdap é su, náng é chyangnâm mâ é bang lé le chyitdap aq."* gâ é tarâ má lo jup to bê nghut lhê. ¹⁰ Chyitdap myit gi, chyangnâm mâ é byù lé a ge é haî le a kut é nghut lhê. Haû mù luî, chyitdap myit gi, haû jep é tarâ lé lhoq dik é hkyô nghut ri.

¹¹ Haû mù, ahkuî lhê é ahkyíng yàm-yoq lé sê gyo luî, haû hkyô lé kut keq. Nungmoq yhup mui é mai bûn gying râ ahkyíng jé bê; haî mù gâ le, nga-nhûng é hkyi yù hkyô gi, lumjíng hi é hkun lhê htoq má ahkuî je chyáng bê nghut ri. ¹² Haû myín ahkyíng gi, lai byuq ló râ za nghut bê; nyí ahkyíng gi, jé lô berâ nghut lhê. Haû mù luî, mauchut é muzó lé tô pyám mù, maubó é gyehking lé wut to sháng. ¹³ Ye lhaî é eq shuq wut é, ashop é dông gungsho zùm yap é eq shut é dông nyi zô lhúm nau é myit bo é, mabyoq jishûm htoq é eq manon é pé a kut é za, nyí-káng lhê su, ge é a-kyang dông nyi yap sháng. ¹⁴ Hau htoq agó, Yhumsíng Yesuq Hkrisduq lé, mebu su wut to keq; yubak gungsho ô nau é dông lhoq dik râ matú hkâ-myit kó.

* 13:9 Htoq Ló 20:13-15 * 13:9 Nhung 19:18

14

Gumang Wui Lé A Jéyáng Râ Hkyô

¹ Lumjín myit má wum nyhóm sù lé, myíng myo nhô zâ é hkyô pé lé a jéyáng byí é za hap yù keq.

² Byù rayuq é lumjín myit gi, jung hkangmó zô ri; nghut kôlhang, lumjín myit nyhóm sù gotù rayuq gi, mhan-haq hpoqnoq za zô ri. ³ Jung hkangmó zo sù gi, a zo sù lé a ge wú tiq pyám; jung hkang jung mó a zo sù gi, zo sù lé mara a ge byi; hkâsu mù gâ le, Garai Gasang gi, yhang lé hap yu to bê nghut ri.

⁴ Nàng gi, ó yuq wá nghut mù, góyuq é dui-nhâng zoshâng lé jéyáng lhê lú? Yhang, yap ging kôlhang, leqbat kôlhang, yhâng é yhumsing myit za nghut lhê. Yhang gi, wó yap ging râ nghut lhê; hkâsu mù gâ le, haù Yhumsing gi, yhang lé wó yap ging nhâng Sù nghut lhê.

⁵ Rayuq myit é gi, buinyì ra-nyí gi, gó nyí htoq je ge lhê gâ ri; dum rayuq myit é gi, nyí wuí rajung za nghut lhê gâ ri. Yuq hkangmó gi, yhumsing myit yu é lé a úng-âng nyì sháng gaq. ⁶ Buinyì ra-nyí lé, ahkyak lhê ga myit yù sù gi, haù Yhumsing é matú kut é nghut ri. Zô é sù gi, Garai Gasang lé jeju hkya-ôn é yanmai, haù Yhumsing lé bun luí zô nyi ri; a zo sù le, haù Yhumsing lé bun luí Garai Gasang lé jeju hkya-ôn nyi ri. ⁷ Hkâsu mù gâ le, nga-nhúng ó yuq nghut kôle, yhumsing matú za asak dui é a nghut; ó yuq nghut kôle, yhumsing matú za shi é a nghut.

⁸ Nga-nhúng asak dui nyi le gi, haù Yhumsing é matú dui é ru nghut lhê; nga-nhúng shi byuq le gi, haù Yhumsing é matú shi é ru nghut lhê. Haù mù, asak dui nyì kôlhang, shi byuq kôlhang, nga-nhúng gi, haù Yhumsing eq sêng é bang nghut lhê.

⁹ Haû su mù, Hkrisduq gi, shi byuq bang eq asak dui bâng é Yhumsîng dut sháng gaq ga, shî hkám mù dum dui toq é nghut lê. ¹⁰ Haû mù, nàng gi, haî mù náng é gumang hpó lé jéyáng nyi lê lú? Haî mù náng é gumang hpó lé wú tiq nyi lê lú? Nga-nhúng lhunghâng bang gi, Garai Gasâng é tarâ jéyáng tanghkuq hí má yap râ bang chyat nghut lê. ¹¹ Hkâsu mù gâ le,

"Haû Yhumsîng gi, 'Ngò rû dui nyi é eq rajung za, Ngá é hí má hkyihput hkangmó htuaq râ nghut lê;

Garai Gasang lé, shô hkangmó èq yín yû kó râ nghut lê.' ga taî ri."✧

ga kê tô ri. ¹² Haû mù luî, nga-nhúng yuq hkangmó gi, yhumsîng kut lai lo é hkyô lé, Garai Gasâng chyáng shit ra râ nghut lê.

¹³ Haû nghut mù, nga-nhúng gi, rayuq eq rayuq tarâ jéyáng lhûm é hkyô lé tô pyám sháng. Ó yuq nghut kôlhang, yhumsing é gumâng é hkyowuî má, myit leqbat jowò eq htung htê jowò a to byi râ matú, myit sidiq keq. ¹⁴ Haû Yhumsîng Yesuq má nghut nyi é sù ngò gi, haî jung zoshuq nghut kôlhang, yhang baú yhang a sansêng a dut é hkyô lé, hkyak wó sé luî, jíng nyi lê. Nghut kôlhang, ó yuq le, rajung jung lé a sanséng ga myit yu é nghut jáng, yhang é matú, zè haû gi, a sansêng é nghut lê. ¹⁵ Nàng zô é zoshuq yanmai, náng é gumang hpó myit a ngón é nghut le gi, nàng, chyitdap myit mai sô nyi é sù a nghut lo. Hkrisduq shî hkám byi bê sù nghut é, náng é gumang hpó lé, nàng zoshuq é dông mai hkâlhoq hten pyám. ¹⁶ Nàng, ge ri ngu

✧ **14:11** Esai 45:23

myit yu é hkyô lé, agè ashop é dông hkâtaî pyám nhâng. ¹⁷ Hkâsu mù gâ le, Garai Gasâng é mingdán gi, zo zo shuq shuq hkyô a nghut é za, dingmán hkyô, nguingón hkyô eq Chyoiyúng Woi-nyí má gabú é hkyô ru nghut lhê. ¹⁸ Haî mù gâ le, shí hkyô dông mai Hkrisduq lé dojaú é sù gi, Garai Gasang ô nau é sù eq byu pê èq hkya-ôn é hui sù nghut ri.

¹⁹ Haû mù luî, nguingón hkyô má nyì râ eq, rayuq eq rayuq wum byî lhum râ hkyô lé, shikut nyì keq. ²⁰ Zoshuq é yanmai, Garai Gasâng é muzó lé hkâlhoq hten pyám. Zoshuq lunglhang gi, sansêng é chyat nghut lhê; nghut kôlhang, góyuq lé myit leqbat nhang é jung lé zô é sù gi, shut é nghut lhê. ²¹ Tsibiyiq wing shuq é eq sho zô é hkyô má nghut kôlhang, gotû haî jung kut é nghut kôlhang, nâng é gumang hpó lé myit leqbat nhang é nghut le gi, a kut le je ge lhê.

²² Haû mù, haú pé eq séng luî, nàng lumjíng é haî nghut kôle, nàng eq Garai Gasâng gyoro má za joq nyì sháng gaq. Yhumsíng ge lhê gâ é èq, yhumsíng gùng yhumsíng mara byî jang a joq é sù gi, hkungsô wó nyì ri. ²³ Nghut kôlhang, úng-âng é myit èq zô é nghut le gi, mara byî é hui ri, haî mù gâ le, yhang zô é gi, lumjíng myit mai a nghut; lumjíng myit mai a kut é haî nghut kôlhang, mara nghut ri.

15

Góyuq Lé Myit Ngón Nhâng Râ Hkyô

¹ Lumjíng hkyô má wum-o bo é nga-nhúng gi, yhumsíng myit ngón râ hkyô lé a ho é za, wum-o a bò bâng é wum nyhóm hkyô lé, hkam jan byî nyì râ dut lhê. ² Nga-nhúng yuq hkangmó gi, yhumsíng

é chyangnâm mâ é su é ge é hkyô dut râ matú, yhang wó kô myhang lò shoq, yhang lé lhoq ngón byî nyî sháng. ³ Hkâsu mù gà le, Hkrisduq lhang gi, Yhânggùng yhang lhoq ngón é a nghut; haû gi, "Nang lé rhoi bâng é dang gi, Ngá chyáng gyó ke bê nghut ri." ✧ ga, kê tô é eq rajung za nghut ri. ⁴ Hkâsu mù gà le, lai lò bê hkún kê tô é lhunglhang gi, nga-nhung lé mhoq byi râ matú chyat kê tô é nghut lê; haû gi, Chýúmdang mâ é hkam jan hkyô eq myit wum byi hkyô dông mai, nga-nhung myit myoqbyù hkyô wó râ matú nghut lê.

⁵ Haû hkam jan hkyô eq myit wum byi hkyô lé byî é Garai Gasang gi, nungmoq, Hkrisduq Yesuq é htâng châng nyi é u lé, nungmoq yhangchang rading ralhúum za dut é woi-nyí byi sháng gaq; ⁶ haû jáng sheq, nungmoq gi, i-myit rahkat eq nhut htê ralhúum èq za, nga-nhung é Yhumsîng Yesuq Hkrisduq é Yhângwa nghut Sû, Garai Gasang lé, wó hkya-on kungtôn kó râ nghut lê.

⁷ Haû mù luî, Hkrisduq gi, nungmoq lé hap yù bê é eq rajung za, Garai Gasâng é hpungwup shingkang lé lhoq htoq shit râ matú, nungmoq le, rayuq eq rayuq hap yu lhum keq. ⁸ Hkâsu mù gà le, ngò, nungmoq lé tai kôlé, haû mying hû é ichyí iwâ pé lé byî tô é danggidiq pé lé lhoq ging râ matú, Hkrisduq gi, Garai Gasâng é tengmán hkýo é malaî, Yudaq byu pé é dui-nhang zoshâng dut bê nghut ri. ⁹ Haû mù, Garai Gasâng é shogyo nhikmyin hkýo é yanmai, haû tungbaù pé, Garai Gasang lé wó hkya-on kungtôn kó râ nghut lê. Haú hkyô gi,

✧ 15:3 Hkya-on 69:9

"Haû mù luî, tûngbaù pé chyáng má, Nang lé, ngò
hkyá-on rà nghut lhê;
Náng é myìng lé, ngò hkyá-on mahkôn rà
nghut lhê."✧

ga kê tô é eq rajung za nghut ri. ¹⁰ Dum,
"Tûngbaù pé ê, Yhâng é byu pé eq rahá gabú nyi
keq."✧

gâ tô ri. ¹¹ Dum,
"Nungmoq tûngbaù pé lhunglhâng bang ê, haû
Yhumsîng lé hkyá-on keq, byù myû
lhunglhâng bang ê, Yhang lé hkyá-on
mahkôn hkôn keq."✧

gâ tô ashî nghut ri. ¹² Hau htoq agó, Esai-aq taí é
gi,

"Yese é Amyit gi, yuq htoq lô luî, Yhang gi, byù myû
chângjup é ahtoq má up rà sù nghut lhê;
tûngbaù pé gi, Yhang má myit myoqbyù kó rà
nghut lhê."✧

gâ ri.

¹³ Haû myit myoqbyù hkyô byî é Garai Gasang
gi, Yhang lé lumhkau nyi é bang nungmoq lé, gabú
hkyô banshoq eq nuingón hkyô lhoq pyíng byi
sháng gaq; haû jáng sheq, nungmoq gi, Chyoiyúng
Woi-nyí é wum-o a-tsâm eq, myit myoqbyù hkyô
wó byíng mui nyi kó rà nghut lhê.

A Gyuq A Wam É Za, Poluq Laiká Kâ É Hkyô

¹⁴ Ngá é gumang wuì ê, nungmoq gi, ge é hkyô
byíng jup é bang, hpaqchyî má gumjup é bang,
rayuq eq rayuq mhoqshit lhûm é má kûng é bang
nghut é lé, ngá gûng ngò yhang hkyak lumjîng

✧ **15:9** Hkyá-on 18:49 ✧ **15:10** Hkyá-on 32:43 ✧ **15:11**
Hkyá-on 117:1 ✧ **15:12** Esai 11:10

lhê. ¹⁵ Ngò gi, nungmoq lé dum lhoq pùn é dông, ahkyak é pé ra-am lé a gyuq a wàm kê kat bê nghut lhê. ¹⁶ Hkâsu mù gà le, tûngbaù pé gi, Chyoiyúng Woi-nyí dông mai lhoq sân-yúng é hui luî, Garai Gasâng eq hap yù gíng é hkungga wó dut kó sháng gaq ga, Garai Gasâng é gabú danglù lé hkô râ hkyangjong é wò dông, tûngbaù pê chyáng, Hkrisduq Yesuq é hpungmû wùn sù dut râ matú, Garai Gasang, ngo lé jeju byî é yanmai nghut lhê.

¹⁷ Haù mù luî, ngò gi, Garai Gasang lé dojaú é hkyô eq séng luî, Hkrisduq Yesuq má nghutbùn nyi lhê. ¹⁸ Ngò gi, ngò taí é eq zuí saí é muzó dông le, haù Woi-nyí é a-tsam chûng mù, kumlhá pé eq laklaí kumlhá pé dông le, tûngbaù pé lé, Garai Gasâng é jìno gyo shoq shuí ù é má, ngo lé Hkrisduq nhang é muzó hkyô lé taí é mai lai luî, gotù haí lé le wám taí é a nghut. ¹⁹ Haù mù luî, ngò gi, Yerusalem wà mó mai Ilurikhkam mau jé shoq é hkyô awui ayàm jàm shoq, Hkrisduq é gabú danglù lé hko kyo bê nghut lhê. ²⁰ Ngò hkâ-nhám le myit tuî nyi é hkyô gi, góyuq hi tô é apùn awang má dum a puq saí pyâm é za, Hkrisduq lé a sé shi é jowò má gabú danglù hko kyo râ hkyô nghut lhê. ²¹ Haù gi, "Yhâng é hkyô lé, taí kyô é a hui shî é bang, myàng kó râ nghut luî,

a wó gyô wú é bang, sê gyo kó râ nghut lhê."☆
ga kê tô é eq rajung za nghut ri. ²² Haù mù luî, ngò, nungmoq chyáng lé jé râ lé, anum num hkyikyo luqlhum dut nyi é gi, muzó hau é yanmai nghut lhê.

Romaq Myuq Lé Ló Kum Râ Sôn É Hkyô

☆ 15:21 Esai 52:15

²³ Nghut kôlhang, ahkuî gi, shí mau pé má ngò zui sai râ jowò a joq lo é nghut mù, nungmoq lé myàng nau nyi é zanwut myo myo nghut bê eq rajung za, ²⁴ ngò, Sipin ming shut ló é hkûn, nungmoq chyáng wàng râ sôn tô lhê. Ngò gi, lai ló é hkûn, nungmoq lé lò sô kum mù, nungmoq eq rayoq zo zùm yap ngón é htâng má sheq, ngá é hkyowui matú, nungmoq haû mai htuqbang kat râ lé, ngò myoqbyu tô lhê. ²⁵ Ahkuî, ngò kúm gi, Yerusalem wà mó mâ é sân-yúng bang lé dojaú râ matú, haû wâ shut e ló é hkyolat má nghut nyi lhê. ²⁶ Hkâsu mù gâ le, Makedoni eq Ahkaia mau mâ é bang gi, Yerusalem wà mó mâ é sân-yúng bâng chyáng mâ é myùng bâng é matú, garúm chyunghuq hkyui tsing nau bùm bekô nghut ri. ²⁷ Yhangmoq gi, haû su kut nau bùm bekô nghut ri, gè gè ga jáng, haû gi, yhangmoq chyîn dap tô é đông ru nghut lhê. Hkâsu mù gâ le, haû Yudaq byu pé é woi-nyí eq sêng é shimân jeju lé, tungbaù pé bo hkam yù bê nghut le gi, yhangmoq é sutzè shimân jeju lé, Yudaq byu pé eq chôm chùng râ chyîn dap tô é đông nghut lhê. ²⁸ Haû mù luí, ngò gi, muzó shí lhum ban kut mù, garúm chyunghuq shí lé, yhangmoq wó hap yù bê lé hkyak sê é htâng má, Sipin ming shut ló râ nghut mù, lai ló uchyang, nungmoq chyáng lé sô kum râ nghut lhê. ²⁹ Ngò gi, nungmoq chyáng lé jé é hkûn, nungmoq é matú Hkrisduq é shimân jeju byíng jup é eq jé lé râ nghut é lé, ngò sê lhê.

³⁰ Gumang wuì ê, ngá é matú Garai Gasâng chyáng kyûdung byí é đông, ngò wum kat yhang shikut é hkyô má nungmoq bo wàng lòm râ matú, nga-nhùng é Yhumsîng Yesuq Hkrisduq eq Woi-nyí

é chyitdap myit é yanmai, ngò, nungmoq lé wum taí tsuq kat lhê. ³¹ Yuda mau mâ é a lumjǐng bǎng chyǎng mai, ngò hkyi yu é wó hui luí, Yerusalem wà mó má ngò wùn waq é muzó lé, haú mâ é sǎn-yǔng bang hap yù gǐng é wó dut rǎ matú kyû bo dung byi keq. ³² Haú jáng sheq, ngò gi, Garai Gasang ô nau é dǒng mai, gabú myit èq nungmoq chyǎng wó jé lé mù, nungmoq eq rahá wum-o wó yû rǎ nghut lhê. ³³ Haú nguǐngón hkyo é Garai Gasang gi, nungmoq banshoq bang eq rahá rû nyi nyi shǎng gaq ô. Amen.

16

Shi-kyám Dang

¹ Ngò gi, Kenhkrea noqkuq hpúng mâ é hpungtê, nga-nhúng é gu-nhá Hpobe lé, nungmoq chyǎng shichyen byí kat lhê. ² Nungmoq gi, sǎn-yǔng bang kut gǐng é eq rajung za, haú Yhumsǐng má yhang lé hap yù luí, yhang rǎ tô é hkyô haí nghut kôle, yhang lé htuqbang keq. Hkâsu mù gâ le, yhang gi, byù myo myo lé le, ngo lé le, gyai yhang garúm lai bê sû nghut lhê.

³ Hkrisduq Yesuq má ngò eq mù wùn luzúm nhik nghut é, Priskila eq Akula lé bo shi-kyám byi keq.

⁴ Yhangnhik gi, ngá é asak é matú, yhangnhik é asak sum rǎ í yhang dut wú kô é nghut mù, ngò za a nghut, tǔngbàu pê é noqkuq hpúng pé banshoq le, yhangnhik lé jeju bǔn lhê.

⁵ Yhangnhik é yhûm má chôm huí zup é noqkuq hpúng lé le, bo shi-kyám byi keq.

Asia mau má, Hkrisduq lé sâng-hi lumjǐng wang lo é, ngò chyitdap é Epanetu lé bo shi-kyám byi keq.

⁶ Nungmoq é matú gyai yhang shikut wú bê sù nghut é Mariq lé bo shi-kyám byi keq.

⁷ Ngò eq rahá htóng lúng wú bê nghut é, ngá é buinùm, Androniku eq Yunia nhik lé bo shi-kyám byi keq. Yhangnhik gi, lagyô pé má myoqdong wó su nhik nghut é htoq agó, ngá é hí má, Hkrisduq má ngò a nyì shi le nyì bê sù nhik nghut akô.

⁸ Haû Yhumsîng má, ngò chyitdap é sù, Ampliatu lé bo shi-kyám byi keq.

⁹ Hkrisduq má, ngamoq é mô zui luzúm nghut é Orban eq ngá é chyitdap luzúm Staku lé, bo shi-kyám byi keq.

¹⁰ Hkrisduq má chyam é hui mù, wó lûm bê sù, Apele lé bo shi-kyám byi keq.

Aristobulu eq sêng é yhumbyù wuì lé bo shi-kyám byi keq.

¹¹ Ngá é buinùm Herudion lé bo shi-kyám byi keq.

Haû Yhumsîng má nghut nyì bê bang, Narkiso é yhumbyù wuì lé bo shi-kyám byi keq.

¹² Haû Yhumsîng má mô zui shikut é myiwê nhik, Truhpena eq Truhposa lé bo shi-kyám byi keq.

Haû Yhumsîng má mô zui gyai yhang shikut é myiwe góyuq, ngá é chyitdap luzúm Persi lé bo shi-kyám byi keq.

¹³ Haû Yhumsîng má hkyin yu é hui bê sù, Ruhpu lé le, ngá nu dông nghut wú bê nghut é Ruhpû é yhângnu lé le, bo shi-kyám byi keq.

14 Asunkritu, Hpelegon, Herme, Patroba, Herma eq yhangmoq eq rahá nyi é gumang wui lé, bo shi-kyám byi keq.

15 Hpilologu, Yulia, Nerea eq yhâng é nhammó eq, Olumpa, yhangmoq eq rahá nyi é sân-yúng bang banshoq lé, bo shi-kyám byi keq.

16 Rayuq eq rayuq, chyoiyúng bopuq é eq shi-kyâm lhum keq.

Hkrisduq é noqkuq hpúng pé banshoq gi, nungmoq lé shi-kyám dang sang kat akô nghut ri.

17 Gumang wui ê, nungmoq é lumjǐng hkyô má, nungmoq mhoq hkam yù bê nghut é mhoqshit hkyô eq shai lhùm é, gam hkoq hkyô pé eq myit leqbat hkyô pé lhoq htoq é bang lé sidiq keq nghû, wum taî tsuq kat lhê. Yhangmoq lé koi pyám keq.

18 Hkâsu mù gâ le, haû sù é bang gi, nga-nhûng é Yhumsîng Hkrisduq lé dojaú é bang a nghut é za, yhumsing é wamdaû matú dojaú é bang nghut akô. Yhangmoq gi, myit nú-nhâm é bang lé, dang ngón dang nguî dông mhaú zô akô nghut ri.

19 Nungmoq, jìno gyo kô é hkyô lé, yuq hkangmó wó gyo bê nghut ri; haû mù, ngò gi, nungmoq é matú gyai yhang gabú nyi lhê; nghut kôlhang, ge é hkyô eq séng luî gi, nungmoq hpaqchyî bò mù, agè ashop hkyô eq séng luî gi, nungmoq a bo lôm râ lé, ngò ô nau ri.

20 Nguingón hkyo é Garai Gasang gi, a myáng má, nungmoq é hkyiwa ô má Tsadán lé nang pyeq pyám râ nghut lhê.

Nga-nhûng é Yhumsîng Yesuq é jeju gi, nungmoq eq rahá nghut nyî sháng gaq ô.

²¹ Ngá é mû zui luzúm Timohti gi, nungmoq lé shi-kyám dang sang kat ri; haû eq rajung za, ngá é buinùm wui Luki, Yason eq Sosipata pé le, shi-kyám dang sang kat akô nghut ri.

²² Laiká shî lé bo ká sù ngò Tertiu gi, haû Yhumsîng má nungmoq lé shi-kyám kat lhê.

²³ Ngo lé le, noqkuq hpúng gón lé le, bîng hkulum é sù Ge-u gi, nungmoq lé shi-kyám dang sang kat ri.

Haû wa mâ é ngùnzui sù Erastu eq nga-nhûng é gumang hpó Kuartu gi, nungmoq lé shi-kyám dang sang kat akô. ²⁴ Nga-nhûng é Yhumsîng Yesuq Hkrisduq é jeju gi, nungmoq lhunglhâng bang eq rahá nghut nyî sháng gaq. Amen.*

²⁵ Byù myû chângiup bang lumjîng luî, Yhang é jîno gyo sháng gaq ga, a-nham pyat mai haq tô é hui kôhang, ²⁶ ahkuî, ahtum abyuq é Garai Gasâng é hkunmó é yanmai, myiqhtoi laiká pé dông hpông shit é eq sé nhâng bê nghut é, sê gyo wui é hkyo é shing-rán má cháng luî, ngá é gabú danglù eq Yesuq Hkrisduq é hkyô taî pyo é dông, nungmoq lé wó lhoq ging tîng byî é, ²⁷ rayuq za é hpaqchyî bo sù Garai Gasâng chyáng, Yesuq Hkrisduq dông mai, hpungwup shîngkang gi, ahtum abyuq ru joq nyî sháng gaq ô! Amen.

* **16:24** Chyúmding ra-am má chyúbun 24 shî a bo é nghut lhê.

Chyoiyúng chyumlaiká: dangshikaq asik; Zaiwa

New Testament in Zaiwa

copyright © 2009 Wycliffe Bible Translators, Inc.

Language: Zaiwa

Translation by: Wycliffe Bible Translators, Inc.

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9781921445408

The New Testament

in Zaiwa

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses,

please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

23f9fc55-a8a4-59ef-9513-707ec336b0ee